

leho



PLATA D'INFORMAZIUN DL COMUN DE BADIA | Nr. 02/2022 | Novèmbër 2022 | www.comunbadia.it

Poste Italiane SpA Spedizione in a.p. -70% - NE/BZ TASSA PAGATA - TAXE PERCUE - Periodico quadrimestrale - Editore: Comune di Badia, Via Pedraces 40, 39036 Badia (BZ)


Nia ma i crëps, mo ince la
contrada jö albas alda pro
les Dolomites UNESCO,
n ambiënt unich al monn
che mëss gní sconé!

INDESC

- 4 La pert di Comuns por la gestiun dl Patrimone UNESCO
- 7 Tru da jí cun la roda
- 8 Rissanamënt di parcs dai jüc
- 10 Sparagn energetich ti Comuns
- 12 Deliberes dla Junta comunala
- 18 Mudaziuns dl bilanz de previjun 2022
- 20 Turism y mobilité tl raion alpin
- 22 Teater musical „Ujöp da Oies“
- 24 Scialdé a lëgna, mo dërt!
- 25 N sorvisc de gran valüta por la comunité
- 26 Lizënzes da frabiché
- 27 Udiënzes y informaziuns

L'EHO IMPRESSUM

La plata vëgn fora 3 iadi al ann y dada fora dal Comun de Badia.
Registrada pro le tribunal de Balsan 2/93. Responsabl do la lege dla stampa é Werner Pescosta.
Comité de redaziun: Werner Pescosta, Elvis Burchia, Elide Mussner, Egon Ploner, Markus Valentini.
Por contatté la redaziun:
eho@comunbadia.it
Impaginaziun: www.pentagon.it
Stampa: Südtirol Druck (Tscherms)



ZERTIFICAZIUN DE VALÜTA

Audit Comun Clima

Ai 20 d'otober á le Comun de Badia albü por le terzo iade l'audit por ciafé danü la zertificaziun de Comun Clima.

L'ombolt Iaco Frenademetz, l'assessuria Edith Dapoz, coordinadëssa dl Grup Comun Clima y Elide Mussner, assessuria por la sostignibilité, ti á presenté les ativités y i vari fac dal Comun de Badia ti ultimi trëi agn ales audities dl'Agenzia Ciasa Clima.

Le focus é gnü metü sön la comunicaziun y sensibilisaziun, y sön la mobilité alternativa. Te chisc ciamps él gnü porté inant deplü scomenciadies sciöche por ejëmpl le sondaje sön la mobilité, le jüch a pesc „Quiz clima“, proiec d'educaziun ala mobilité adöm cun les scores, mo ince plü de gragn proiec coche n „bus a cherdada“, olach'an stüdia ciamó coch'an podess le mëte a jí te nosc comun.

Cun les audities él spo ciamó gnü baié dl *Plann por le clima* che le Comun de Badia á bele invié ia tl 2019 sciöche un di püc comuns de Südtirol, dla partezipaziun dl Comun ala „Regiun Clima“ de Puster, dles mosöres por sparagné energia y dl'importanza de n laur en sinergia cun la Cooperativa turistica Alta Badia por n turism sostenibl. Sön chësc punt ti á spo Max Nagler, diretor dla Cooperativa, porté dant ales audities la zertificaziun GSTC – *Global Sustainable Tourism Council*, che la destinaziun „Alta Badia“ á ciafé dan da püch.

Al'incuntada á ince tut pert l'aconsiadëssa Bernadette Crazzolaray l'aconsiadú Elvis Burchia, trami mëmbri dl Grup de laur Comun Clima.

Les audities á dër laldé le Comun de Badia por so impëgn por na majera sostignibilité. Le resultat ofizial dla zertificaziun nöia gnará comuniché plü inant, la premiazion di Comuns Clima de Südtirol vëgn tignida ai 15 de novëmber a Balsan.



Le Grup de laur Comun Clima cun les audities dl'Agenzia Ciasa Clima che á le dovëi da verifiché sce le Comun de Badia á fat vari inant por podëi mantigní la zertificaziun ciafada dan da val' agn. Sön le re-trat dmc.: Elide Mussner, l'ombolt Iaco Frenademetz, les trëi audities dl'Agenzia Ciasa Clima, Edith Dapoz, Bernadett Crazzolaray, Elvis Burchia y Max Nagler, diretor dla Cooperativa turistica Alta Badia.



L'ombolt Iaco Frenademetz

Stimá zitadins dl Comun de Badia,

i sun contënt da podëi Ves presenté te chësta plata d'informaziun les ultimes initiatives y i proiec dl'Aministrazion comunala, tratan ch'i aspetun na resposta definitiva sön les domandes ch'i un mené inant por ciafé i contribuc odüs dant dal *PNRR (Plann nazional de recuperada y resiliënza)*. Sambëgn sperunse da ciafé le finanziaimënt ch'i adorun almanco por un o l'ater proiet, ch'i un ince bele presenté tl'ultima ediziun dl EHO.

Sön i laurs atuai mëss le Comun tres indô curí l'aumënt di prisc di materiai y di laurs da costruì, nia saurí da odëi danfora. Implü mancel ince na pert dles entrades ch'an è zënza ausá da avëi a desposiziun. Baldi pësa chësc fat ince sön les poscibilités dl Comun da dé contribuc a uniuns y associazions.

N argomënt da afronté cun urgënza é ince chël dl consum d'energia, cialt y forza eletrica, che á albü n aumënt dl prisc fora de mosöra tl ultimo ann. L'unica poscibilité ch'an á al momënt é chëra da sparagné dlunch olach'ara vá. Porchël án ince bele metü man da lauré fora strategies y planns de coch'an pó fá da sparagné, zënza jí zoruch cun i sorvisc publics.

N argomënt delicat é dötaurela le tru dla roda, olach'an á impröma tigní cunt di resultac di stüdi y dles inrescides fates ti ultimi agn y dles ghiranzes portades dant te deplü ocajiuns dai rapresentanc dles organisaziuns y categories interessades. En confrunt ala pröma proposta de proiet bele laurada fora tl 2017, án ciaré da adoré manco lerch ch'ara jô, tignin insciö cunt dles osservaziuns di proprietars di grunc. Nia ma a nivel provincial, mo ince nazional y internazional, ciaron da ti dé la poscibilité ala jënt, pici y gragn, da se sposté cun la roda – en segurëza – zënza tó l'auto. Ince le Comun de Badia á porchël le dovëi da fá süa pert y da realisé na infrastrotöra por na mobilité plü sostenibla, che ti pitará n sorvisc ai foresc y dantadöt ince a nosta jënt.

Tles plates che vëgn do ciafëise informaziuns plü menüdes sön le bilanz, sön i laurs y i cosc revardënc y d'atres noeles che á da nen fá cun les ativités dl Comun. Da mia pert y da pert dl'Aministrazion comunala ti diji giulan a dötes y a düc chi che nes sostëgn y nes dëida a val' maniera da realisé i laurs che vá a bëgn de nosta comunità.

L'Ombolt



INCUNTADA DLA JUNTA DE COMUN CUN LA POPOLAZIUN

en lönesc, ai 21 de novëmber 2022,
dales 20.00, tl salf dla Ciasa de Cultura a La Ila

Te chësta ocajiun sarál ince i esperc dl Ökoinstitut che presenterá en cört ci che le Comun á fat por mioré la sostignibilité y limité le consum de cialt y de forza eletrica.

INCUNTADA CUN LES UNIUNS Y ASSOZIAZIUNS

en jöbia, al 1. de dezëmber 2022,
dales 20.00, tla sënta dla Biblioteca
„Sas dla Crusc“ a La Ila

La pert di Comuns por la gestiun
dles DOLOMITES UNESCO

Conescënza, Responsabilité, Cosciënza.

Ai 21-22 d'otober 2022 á la Fondaziun Dolomites UNESCO metü a jí n curs por aministradus comunai tl *Palazzo Piloni*, sênta dla Provinzia de Belun, olach'al é gnü splighé coche les aministrazions comunales pó fá da daidé crêscie y deslarié fora la cosciënza dl'importanza dl Patrimone Mondial. Sciöch'i savun alda ince na pert de nosc raiun comunai lapró: i raiuns che toma ite ti parcs naturai de Fanes-Senes-Braies y Pöz-Odles fej ince pert dles Dolomites UNESCO.

Por valorisé le reconescimënt UNESCO dles Dolomites mësso dantadöt ester bogn da capí le significat de chësc reconescimënt y da individué poscibilités de scolaranza y valorisaziun dl ambiënt, dla sozieté, dla cultura y dl'economia por i raiuns y por les comunités che mëss savëi co gestí le Patrimone. **Conescënza, Responsabilité, Cosciënza** é i trêi elemënc ch'an adora por definí n ciamp d'aziun por mëte impé strategies y ativités por la valorisaziun dl sit Dolomites. De chësc vers araton che i Comuns, mo ince les Provinzies y les Regiuns dess ester n punt de referimënt fundamental, por podëi deslarié fora i valurs definis dal'UNESCO y ince nen tigní cunt te dotes les deziijuns che vëgn tutes.

Aministradus deboriada por les Dolomites Patrimone Mondial

Cherié deplü ocagiuns d'incuntada y de barat, renforzé le coliamënt danter la Fondaziun Dolomites UNESCO y i ênc locai (comuns), daidé da ponsé do deboriada sön les aziuns da invié ia por mantigní ativamente le Patrimone, zënza ascogne, mo valorisan les desfarënzies y les aspetatives desvalies di singui raiuns. Insciö pón trá adöm i argomënc che é gnüs tratá tratan le curs a Belun che dô ester n meso por promöie la **Conescënza, Responsabilité, Cosciënza** tla gestiun dl Patrimone Mondial.


L'UNESCO n'é nia na marca ch'an mina val' iade da adoré por reclam, mo al é n'atestaziun de valor.

Belluno 21-22 ottobre 2022



Conoscenza, Responsabilità Consapevolezza.

Il ruolo delle amministrazioni
locali per la gestione delle
DOLOMITI UNESCO



La Fondaziun Dolomites UNESCO dess ester n punt de referimënt por duc i interessá. Porchël é important da tlarí ci che ara fej, fazon impröma le punt de chël che é sté le reconescimënt, por capí ci ch'an pó döt fá cun le potenzial ch'an á.

Cun le curs a Belun se tolô la Fondaziun Dolomites UNESCO dant da arjunje chisc fins:

- ajorné les conescënzes di aministradus comunai sön le sens dl reconescimënt, sön la strategia de gestiun dles Dolomites UNESCO, sön le sistem de governance
- daidé crêscie le sêns da fá pert dles Dolomites UNESCO y cherié n'ocagiun de barat de esperiënzes danter aministradus de raiuns desvalis che é interessá dal reconescimënt
- ti fá capí impröma ai aministradus che la responsabilité dl'integrité y dla gestiun dl Patrimone é früt de programs y aziuns integrades da adoté sön deplü livi istituzionai
- aumenté la cosciënza dla pert dles aministrazions locales tla definiziun de strategies y aziuns de valorisaziun dl Patrimone
- mioré le barat danter Fondaziun Dolomites UNESCO y les aministrazions comunales por individué ciamps d'intervënt y poscibilités da jí inant deboriada.

Le president dla Fondaziun Mario Tonina: „La pert di aministradus é fundamentala“

L'iniziativa, nasciüda dal debojègn fundamental de na formaziun por capí tla dërta manira i valurs dl reconescimènt dl'UNESCO, é ince stada n'ocajun importanta de dialogh costrutif danter i partezipanc che gnò dales provincies de Belun, Trènt y Balsan y dal Friul. Chi che á tut pert s'á fat pinsiers deboriada sòn la funziun y les aziuns che pó gní metüdes a jí da comunités tan desvalies dal punt d'odüda demografich, economich, sozial y cultural.

„Cun l'elaboraziun dla Strategia Complessiva de Gestiu dl Patrimone án chirí fora le tru dla partezipaziun ativa de düc i sogec che operèia tl raiun UNESCO cun titui desvalis, y la pert di aministradus é dessigü öna dles plü delicates y importantes por almanco döes rajuns, – á comenté le **President dla Fondaziun Dolomites UNESCO Tonina** – öna é chëra dles dezijiuns che ai mëss tó vigni de, olach'ai pó y mëss tigní cunt dla gestiun y dla conservaziun ativa dles Dolomites, l'ater é chël da trá ite y da ti dé inant la cosciënza ales comunités ch'ai rapresentèia. Defat mëss les comunités gní acompagnades y odëi fora les oportunités ch'ares pó avëi tres le reconescimènt UNESCO“.


Le salüt dl president dla Provincia de Belun y dl ombolt

Ince sce les Dolomites UNESCO é caraterisades da na gran varieté de contesc sozioeconomics, de chi ch'al é gnü baié tröp tratan i dui dis de curs, é l'obietif che düc á deboriada chël da garantí na sconanza ativa dl Patrimone, che sides bona da promöie i valurs ambientai, soziai, culturali y economics di singui raiuns y dles comunités che vir te chisc raiuns.



„I pröms promoturs dla sconanza y dl mantignimènt dl Patrimone UNESCO é chi che vir te nüsc raiuns y dantadöt i aministradus – á dit le **president dla Provincia de Beluno Roberto Padrin**. Le valur de n curs coche chël ch'i tignun chisc dis a Palazzo Piloni é propi chël ch'al vëgn renforzé l'ester braui y le sèns de fá pert dl raiun dolomitich y de sü valurs y spo ince l'imparé ci che le reconescimènt UNESCO ó dí, por valorisé les Dolomites y lapró ince les comunités che vir tles Dolomites“.

„Giulan por tigní a Belun n apuntamènt tan important che á metü la formaziun di aministradus comunai tl zènter – á dit l'**ombolt de Belun Oscar De Pellegrin** te so salüt ai partezipanc. Aministré é ri te vigni post – á injunté De Pellegrin – le fá te raiuns che tol ite Patrimoni Mondiai ti dá a vigni dezijiun politica n significat lapró, al nes sforza da jí plü sot tles cosses deach'al é debojègn da fá jí a öna la politica cun le respet y la cura de n ambiënt straordinar y n ecosistem dër delicat. **La sfidada di proscimi agn sará chëra da ciafé soluziuns por tröpes cosses, olach'i arun debojègn dl impègn de düc canç“.**



Le curs por i aministradus comunai tigní a Belun é gnü metü a jí dala Rëi dla Formaziun y dla Inrescida Scientifica dla Fondaziun Dolomites UNESCO, coordinada dala Provincia autonoma de Trènt tres la tsm|step Scora por le Govern dl Teritore y dla Contrada.

N curs informatif, na basa por le dagní

Ai amistradus ti él impröma gnü dé les informaziuns ch'ai adora por podèi dé inant i valurs dl'UNESCO, giulan al intervënt dla diretoria dla Fondaziun Dolomites UNESCO Mara Nemela da Cianacëi (Fascia) y dl prof. Piero Gianolla (Departimënt de Fisica y Sciënzes dla Tera dl'Università de Ferrara) che á splighé **le valor geologich universal dles Dolomites (outstanding universal value) che é basé sön trëi pilastri:**

- **respet di criters UNESCO por le reconescimënt de n Patrimone Mondial**
- **integrité y autenzitè**
- **proteziun y gestiun dl Patrimone**

Dedô á duc i partezipanc y les partezipantes podü tó pert al'inauguraziun dla mostra *Dolomites. Fenomens geologics y contrades umanes* metüda adöm cun l'aiüt de deplü museums y istituziuns y curada dal prof. Bruno Zanon. Zanon á ince splighé i fins dla mostra itineranta che gnará spo metüda a desposiziun dles scores, dles amistraziuns y dles assoziaziuns.

Tratan le secundo de de curs él gnü rajoné sön aziuns che podess ince gní inviadés ia cun la partezipaziun di zitadins y dles comunités locales, pian ia dai intervenc dila prof.a Benedetta Castiglioni (Università de Padua) y



Na pert di amistradus di comuns UNESCO sentá adöm pro na mësa por porté dant so punt d'odüda sön le Patrimone Mondial y por capí deboriada co fá da le scone.

dl prof. Mauro Pascolini (Università de Udin), por rové cun les contlujuns dl prof. Annibale Salsa, mëmber dl Comité científich dla Fondaziun Dolomites UNESCO.

Nos ch'i viun tles Dolomites, co podunse pa afronté le mudamënt climatic?

Discusiun sön le mudamënt climatic y sües conseguënzes cun le prof. univ. Georg Kaser, ai 29.11. 2022, tla Ciasa de Cultura a La Ila

Georg Kaser é n glaziologh y un di inrescidus dl clima plü stimá dl monn. Al é nasciü a Maran y á fat inrescides sura döt le monn se concentran dantadöt sön la faziun dl clima sön la vita di dlacias. Kaser é sté cina tl 2021 degan dla Facolté de Sciënzes dla tera y dl'atmosfera dla Università Leopold Franzen a Desproch. Dal 2021 incá él en pensiun. **Chèstes é n valgönes domandes che ti é gnüdes menades danfora y a chères ch'al ciarará da respogne en ocasiun dl'incuntada a La Ila.**

- Signur Kaser, Os sëis un di scienziá plü importanc dl monn y i ves dëis jö da dezens cun le clima de nosta tera. Ci s'á pa mudé dal scomenciamënt de Osc laur cina incö?
- Te Ostes inrescides s'ëise concentré dantadöt sön i dlacias dl monn.
- Ci pó pa nes dí n dlaciá sön nosc clima? Y ci fajëise pa avisa te Ostes inrescides?



Le prof. univ. Georg Kaser

- Os ëis ince lauré adöm cun le *Intergovernmental Panel on Climate Change*. Ciun compit á pa chësta organizaziun?
- Les Alpes é n ecosistem dër sensibl, che é toché dassënn dal mudamënt climatic, ince sc'i ne sun nia ciamó dër cosciënc de chësc. Le scialdamënt dl clima tles Alpes vá le dopl plü snel inant co plü injö tl süd. Ciodí pa?
- Les Dolomites á n'economia dër svilupada che taca adöm cun le jí cun i schi. Tres plü gonot dij i scienziá che tl dagní sarál tres plü ri da jí cun i schi y magari cinamai imposcibl. Co ciara pa fora Osta previjiun?
- Ci dessun pa tó en conscidraziun, nos ch'i viun tles Alpes y tles Dolomites, por afronté le mudamënt climatic?
- Cun ci sensaziuns Ti ciarëise pa al dagní climatic de nosta tera?

Tru da jí cun la roda y a pe

Tla sentada dl Consëi de Comun di 26 d'otober 2022 él gnü traté les obieziuns presentades da Sigrîd Piccolruaz, coche portausc dl comité „Salvun le tru do l'ega“ (prot. nr. 15623 di 10.08.2022), y da Claus Fistill (prot. nr. 15783 di 12.08.2022), cuntra la delibera tuta a maioranza (11:6) dal medemo Consëi de Comun ai 29 de messé 2022.

Tla sentada di 7 de setëmber â la Junta bele tut a conscënza les obieziuns presentades ti termins odüs dant y â traté daimprojö les osservaziuns, aladô dl art. 5, coma 4, dl Regolamënt comunel che reverda „l'oposiziun a deliberaziuns de Comun“. La Junta ê inultima stada a öna al'unanimité da refodé les obieziuns cun chëstes motivaziuns:

- Le proiet corespogn ales aspetatives y ai bojëgns dl'Aministrasiun por arjunje l'interes publich da realisé n tru dla roda, sciöch'al é gnü fora dales reuniuns olache i grups d'interes desvalis (stakeholder) ê rapresentá:

 1. reuniun dl grup por la mobilité cun la roda
 2. reuniuns por le program de svilup comunel por le raiun y la contrada
 3. reuniuns dl *Green Team Alta Badia*
 4. reuniuns dl grup *Green Mobility*
 5. reuniuns Comun Clima
 6. inrescida suracomunala cun l'Ökoinstitut Südtirol/Alto Adige sön la mobilité
 7. reuniun cun i Comuns de Corvara y La Val

- les osservaziuns vëgn porleplü argomentades cun interes particulars de na categoria specifica (amisc di ciavai)
- les osservaziuns se referësc dantadöt al percurs dl itinerar dl tru dla roda y da jí a pée, che ne n'é nia argomënt dla delibera en chestiun. La trassa dada dant tl proiet corespogn a chëra portada ite tl plann comunel varënt por le raiun y la contrada; chësta trassa é gnüda portada ite regolarmënter d'ofize sciöche tru dla roda suracomunel „Val Badia“ tl Plann urbanistich comunel cun deliberaziun dla Junta provinciala nr. 3840 di 23.10.2006, publicada söl Boletin Ofizial nr. 47/I-II di 21.11.2006
- la larghëza odüda dant tl proiet toma ite ti limic odüs dant dal art. 45 dl Regolamënt comunel por le frabiché dl Comun, che fej referimënt al art. 21 dla Lege provinciala nr. 9/2018, o al DPP nr. 24/2020,

che al art. 35, coma 3 dla „Injunta A“, „Tru dles rodas“, scrí dant la larghëza ch'an pó avëi da 2,5 a 6 m. Le proiet respetëia ince les desposiziuns dades dant tl capitul VIII dl DPP nr. 6/2022

- en fasa de elaboraziun dl proiet esecutif gnarál tut en conscidraziun, sc'ara vá dal punt d'odüda tecnich y normatif, les osservaziuns portades ite, te na manira che le percurs pois gní adoré da dotes les categories interessades

I aconsiadus dla „lista Manfred Canins“ á messü s'astegní dala deliberaziun

Aladô dl art. 65 dl Codesc di comuns dla Regiun autonoma Trentin Südtirol (Lege regionala 03.05.2018, nr. 2) sön le „dovëi d'astenziun dales deliberaziuns“, á i aconsiadus Claus Fistill, Walter Valentin, Manfred Canins, Sara Pescollderungg, Egon Ploner y Susanna Canins, che â firmé la petiziun cuntra la dezijiun dl Consëi de Comun, messü s'astegní dala deliberaziun sön chësc punt y s'un jí fora dl salf de reuniun. Chësc do ch'ai á firmé para la petiziun dl comité „Salvun le tru do l'ega“, jon ite te n conflit d'interes.

Tl pröm coma dl art. 65 dl Codesc di comuns, che reverda l'astenziun dales deliberaziuns, vëgnel tlarí che:

- I componënc de organs colegiai dl comun mëss s'astegní da tó pert ales deliberaziuns che reverda ënc privac, associazziuns, comites, sozietés y dites cun chëres ch'ai á n raport d'aministrasiun, vigilanza, dependënza o prestaziun d'opera, coche ince canch'ara se trata de n interes sön le momënt y atual de se instësc o dl om o dla fomena o dla porsona cun chëra ch'an é maridá te comun o cun chëra ch'an vir adöm de fat [...] o de parënc cina le secundo degré. Le dovëi d'astenziun comporta ince le dovëi da jí fora dl salf de reuniun tratan ch'al vëgn baié dles chestiuns bele dites.

Do la discusciun sön les chestiuns bele dites dessura á le medemo Consëi deliberé cun 11 usc a öna, 0 usc contrares y 0 astenziuns sön 11 aconsiadus presënc y litanc (delibera nr. 38), da refodé por les rajuns dites dessura les obieziuns portades ite da Sigrîd Piccolruaz coche portausc dl comité „Salvun le tru do l'ega“, y da Claus Fistill.



Ressanamënt di parcs dai jüc, por nostes mitans y nüsc mituns

Tl comun de Badia él indöt 14 parcs dai jüc: te vigni paisc nen n'él un o ince deplü a desposiziun de mituns y mitans y dantadöt ince dles families cun de pici mituns. Tratan l'ultimo isté él gnü fat cotan de laurs da ressané i jüc, por garantí la segurèza y la cualité di parcs.

Sciöch'i savun vëgn i parcs dai jüc frequentá oramai vigni de da pici y gragn, da jënt dl post y da foresc, porchël él scialdi important ch'ai vëgnes mantignis bun, fajon la

manutenziun che vá debojëgn. Tratan l'isté él gnü fat de pici y de gragn laurs, por cuncé o mudé fora na pert di jüc plü en malester. Ajach'ai é scialdi de lëgn, se rovini plütosc sauri da sté tres defora alaleria, sot le tëmp. Pro val' un él ma gnü mudé fora na brëia o l'atra o poester n pe frat, renforzé la stabilité cun pisc de fer o val' tre, o ince sferié demez les spines che zacai ess podü se ficé. N gran laur important é ince sté chël da mëte apost les proteziuns sot i jüc ite, sce zacai ess da tomé jö. An á ince ciaré da garantí la dërta altëza y da mëte do demeztrú scorzes morjeles sot i jüc ite. Sce i mituns y les mitans ess da tomé jö, spo ne se feji almanco nia tan me.

A SAN CIASCIAN

De majeri laurs é gnüs fac pro la plaza dai jüc dlungia le ciamp dal sport da San Ciascian, olache i jüc é gnüs metüs jö danü te na manira da garantí les destanzes de segurèza danter un y l'ater. Tl urt dla scolina da San Ciascian él gnü mudé fora le cëst dla gran sbinga y deplü tres de lëgn da se senté y pro la cassa dal saurun. Tl parch dai jüc de Costadedoi él gnü metü apost la si y comedé fora val' picolëza.

A LA ILLA

Val' pice laur de manutenziun án ince fat pro le parch dai jüc daite dal ciamp dal sport a La Ila. Dlungia la scora elementara a La Ila él indere gnü fat danü le tèt dla picia ütia y la si dala pert cuntra strada é gnüda fata plü alta por garantí na majera segurèza.

Ince tl urt dla scolina da La Ila él gnü fat deplü de te pici laurs: al é gnü comedé fora brëies frades y renforzé val' tre. Tl parch dla zona Ninz él gnü fat n gran laur da ressané la furnadoia: al é gnü renforzé i pisc di pa che





N valgügn retrac di parcs dai jüc dl Comun de Badia. Por süa manutenzione y por mudé fora i jüc che ne jô nia plü da cuncé tl urt dla scolina da San Ciascian, tl parch dai jüc de Boscdaplan y te chël de Jonorëis él gnü spenü 67.570,16 euro. I scioldi é dessigü investis bun, dal momënt ch'ara nen vá dla segurëza dles mitans y di mituns che passa tröp tēmp ti parcs a fá la belëita, defora, alaleria.

vá jö te tera, mudé fora val' brëia frada pro le podest y sistemé la tenjiun dla corda. Implü él gnü tut demez le funz da tera sot ite y implí sò cun scorzes.

Ince pro le parch dai jüc Boscdaplan é le majer laur sté chël da ciavé sot i jüc nüs ite y mëte jö na proteziun de scorzes morjeles sce zacai ess da tomé jö. Chiló án spo ince sposté i jüc por partí ite damí la plaza, olach'al é ciamó d'atri laurs sön le program. Danter l'ater gnarál metü sò döes pices portes da soghé al palé y n gherist cun n linzö da fá ambria sura la plaza dal saurun.


A BADIA

Tl parch dai jüc de Jonorëis a San Linert é ince gnü comedé fora deplü brëies frades y sistemé le funz cun scorzes sot i jüc ite. Lapró él ciamó gnü mudé fora la vedla sliziadoia de banda; la nöia che é gnüda metüda sò é de plastica y ne se scialda nia sò tan saurí. Tl urt dla scolina da San Linert é val' jüch gnü sferié jö danü, por ch'an ne se fices nia spines tratan ch'an sogá.



Cun la colaboraziun dl inj. Günter Dichgans dl VKE gnarál ciamó fat d'atri laurs de abelimënt y otimisaziun tl 2023, dantadöt ti parcs dai jüc de Ninz, Jonorëis y Boscdaplan.

Sparagn energetich ti comuns



N PREREQUISIT IMPORTANT: naota mosoré, spo fá!

Te na incuntada cun i representanc dl'Agencia Ciasa Clima dla Provinzia de Balsan él gnü baié de zacotan de mosöres che i Comuns pó adoté te ciamps d'aziun desvalis (frabicac, implanc, ilominaziun publica, mobilité y i.i.), atira y ince te n tēmp plü lunch. Le Comun á la poscibilitá da fá valch diretamēter y indiretamēter. I consums (energetics y dl'ega) di ciamps d'aziun bele nominá mēss gní registrá y analisá tres la contabilité energetica. La documentaziun di consums energetics y idrics por seturs de energia elettrica/cialt/ega adoron por abiné fora atira sce valch ne vá nia o sce i consums vá sō, ciafé spo mosöres da adoté por mioré l'efiziēza y valuté la faziun de chēstes mosöres evidenzian le sparagn energetich.

I **software** profescionai de gestiun y de control dl'energia é d'aiüt por cherié n report energetich spezfich por i frabicac comunai y é bun da trá adöm i dac de consum y de efiziēza energetica di frabicac desvalis.

Denanco pié ia cun mosöres por mioré l'efiziēza él dagnora important da fá naota na diagnosa menüda dl frabicat, che toles ite sides le frabicat instēs co i implanc. Sc'an sá avisa coche la situaziun é, spo pón invié ia intervēnc sōn mosöra por vigni frabicat.

Mosöres dl Comun de Badia por sparagné energia

Do l'incuntada cun i esperc dl'Agencia Ciasa Clima, s'á la Junta comunala incunté ai 11 d'otober cun i tecnics y lauranc de Comun por valuté deboriada les mosöres da tó por sparagné ega, cialt y forza elettrica pro i frabicac y les infrastrotöres comunales.



L'ombolt Iaco Frenademetz á recordé danfora che le Comun de Badia á dejeset de majeres ciases publiches y implanc da mantigní (ciases dles uniuns, scores, scolines, implanc sportifs y i.i.), l'ilominaziun publica cun cotan de löms y i.i.; les somes che é bele gnüdes metüdes tl bilanz dl 2022 por curí chēstes spēises é de:

207.000,00 euro
por forza elettrica por l'ilominaziun publica
390.000,00 euro
por forza elettrica dles ciases publiches
470.000,00 euro
por scialdé les ciases publiches.

Aladô dles previjiuns mancessel ciámó sō por 300.000,00 euro da rové ala fin dl ann 2022. Insciö ro-vasson sō a incēr 1.500.000,00 euro de spēises. Aladô di esperc de Ciasa Clima ne messessel nia ester de gran dificoltés da sparagné le 10%, che fajess tl caje dl Comun de Badia fora sō por 150.000,00 euro al ann.

N valgügn punc fora dl protocol dl'incuntada

L'ombolt á damané i tecnics da ponsé fora, chirí y ciafé soluziuns che vais bun por le Comun, tignin cunt dl promemoria di ciamps d'aziun bele arjigné ca dai esperc de Ciasa Clima y dla lista dles ciases publiches y dles strades, olach'al é l'ilominaziun publica.

Le tecnich inciarié da manajé l'implant de congeneraziun a San Linert, inj. Emerich Pedratscher, á splighé che i implanc dl Comun é bele regulá cun systems eletroniche dēida sparagné, porchēl sarál ri da mioré plü co intant de chēsc vers. Ara jiss indere da arbassé le cialt de n de-gré y mené zoruch le scialdamēnt n'ora al de, aladô dla diretiva nazionala.

Porimpó él da mēte averda, deache da arbassé demassa podesson ince avēi problems de müfa y i.i. L'inj. Pedratscher á spo splighé che, aladô de n decret nü dla Provinzia, él gnü odü dant da arbassé la löm dl 50% pro les löms nöies dl'ilominaziun publica. Porimpó él ince chiló da mēte averda da ne fá nia massa scür, por chestiuns de

segurèza. Danter l'ater esistel na norma che dij avisa tan de l'om ch'al mëssester sön strada, olach'al é na ilominaziun publica.

Le tecnich de Termoladinia, Sepl Moling, che ti stá do ai implanc de scialdamënt de deplü ciases dl Comun á dit ch'al foss te vigni caje important da ti comuniché ales porsones de competënza ch'al é da sparagné y lapró ince les directives che dess gní tignides ite. Tles scores, por ejëmpl, podesson ciaré da daurí demanco les finestres (nia sciöche tl tēmp de Covid), por ne messëi nia scialdé tan tröp y por nia. Sepl Moling á ince splighé ch'al ne messess nia ester n problem da jí jö cun la temperatöra a 19°C tles ciases y ti locai publics, mo an mësse ti comuniché a düc chi che i gestësc y che ciara sura, ch'al vëgn tut mosöres por sparagné: ales scores, ai ambulatori, ai gesturs dles ciases de cultura y al publich.

La proposta é porchël chëra da mené fora na zircolara, che messará tigní cunt dles disposiziuns che gnará ciamó fora, cun les informaziuns che vá debojëgn, lapró ince indicaziuns sön coch'an dess se comporté. Por ejëmpl desson tigní sö i „raffstore“ tles scores, ater co sc'al dá ite massa sorëdl che destürba. Canche la scola é rovada mësse te vigni caje podëi ite sorëdl, spo s'la cavon da scialdé demanco. Daurí i vidri desson ma ala fin dl'ora por n valgügn menüc y spo stlütje indö y i.i. Te vigni local dessel gní metü n termometer da podëi ciaré do y mené jö la temperatöra sc'al é massa cialt. Chi che adora i locai dess instësc avëi n responsabl che ciara do demeztrü y tēgn sot a control la temperatöra, regolan i radiadus; implü gnará fat contro i da pert di lauranc de Comun.

An á spo individué i responsabli y les porsones de referimënt che ciara do i implanc da scialdé dles ciases publiches desvalies, che vëgn spo contatades por ti comuniché les indicaziuns nöies dl Comun por sparagné cialt. Pro le cantier comunal nü gnará ciamó valuté les poscibilités ch'an á da sparagné.



Canch'al gnará fora les normes da pert dla Provinzia, ciarán da mëte jö n regolamënt a chël che düc i utënc dles ciases publiches messará se tigní por sparagné.

Implanc eletrics

Al é spo gnü ciaré olach'ara jiss da sparagné forza eletrica, destodan les löms de nót. Al é gnü fat fora da destodé l'ilominaziun publica, dales 23.00 ales 05.00 – aladö dl decret varënt –, te chisc posc:

- les trëi cortines de Badia, La Ila y San Ciascian;
- ilominaziun defora dles dljies y di monumënc (ince Oies);
- implanc dal sport. En general él gnü dit da ti scrí ales uniuns y associazziuns sportives, ch'ares ciare da adoré manco löms ch'ara vá.

Lapró él gnü fat fora da destodé les löms (dales 23.00 ales 05.00) fora di zëntri di paisc, dantadöt do tretuars de coliamënt: Hotel Atlantic-Puntac, Villa Erika-Anví, Oies, Badia-La Ila (Sompunt-Hotel Teresa), Funtanacia, Verda, Ciampidel-Costadedoi; Bella Vista-Ai Pini, Dlira, Sciaré, zënter dl paslunch (ciaran da lascé l'ilominaziun di passaji pedonai). Na lista plü detaiada gnará ciamó arjignada ca, por imposté i implanc d'ilominaziun aladö. Ti zëntri, olach'al é löms doples o triples, nen gnará ma plü lascé öna sora.

 1 Scialdamënt	 8 Ilominaziun dla strada
 2 Ega y ega cialda sanitaria	 9 Forza eletrica en general
 3 Incëria (mürs, finestres y tët) efiziënt	 10 Implanc fotovoltaics
 4 Implanc de ventilaziun	 11 Implanc ega da bëre y de desgorta dl'ega paza
 5 Implanc de climatisaziun	 12 Nodadoies
 6 Aparac eletrics	 13 Gestiun dla mobilité
 7 Ilominaziun daite	 14 Sensibilisaziun y motivaziun

Te na brosciüra presentëia l'Agenzia Ciasa Clima dla Provinzia de Balsan n promemoria di ciamps d'aziun olach'an podess fá valch por sparagné ega, cialt y strom. Por vigni ciamp vëgnel dé na linia de consëis che i Comuns, mo ince i privac, i eserzizi d'alberch y i.i. podess adoté. Chi che ó ti ciaré plü avisa pó desciarié jö la brosciüra sön dala plata internet www.klimaland.bz.

Deliberes dla Junta comunala

Sentada di 03.08.2022

Al é gnü aprové da cumpré n meso multifunzional cun atrezadöres azessores por desparé d'invern y por deplü sorvisc sön les trades. Al é porchël gnü fat fora da **cumpré n Unimog Mercedes Benz U435 4x4** cun injin da sterne se, fresa y cadrëia dala dita Autoindustriale da Balsan. **La spëisa aprovada é de 341.000,00 euro + 22% CVA**, aladô dl'oferta di 12.07.2022.

Al é gnü fat fora de invié ia aladô dla L.P. di 15.04.1991 nr. 10 l'espropriaziun dla strada comunala d'azes ala zona por atrezadöres coletives, aministraziun y sorvisc publics tla localitè Sompunt sön la p.d.t. 5408/18 C.C. Badia.

Al é gnü aprové la documentaziun y le proiet lauré fora dal inj. Emerich Pedratscher por mioré l'efiziënza energetica dl implant d'ilominaziun do la strada Ninz a La Ila. La spëisa preodüda y aprovada por i laurs da scrí fora é de 71.847,98 euro. Al é spo gnü fat fora da dé ia i laurs cun prozedöra de tratativa zënza publicaziun danfora de n avis de gara, cun prisc sön mosöra y cun le criter dl prisc plü bas cun arbas perzentual.

Al é gnü aprové da surandé chëstes inciaries por laurs, prestaziuns de sorvisc y condütes de material en economia:

- Decor S.r.l.: 1.622,95 euro por laurs da sistemé la falzada dla Ciasa J.B. Rinna a San Ciascian;
- Puerari S.n.c.: 102,96 euro por mapes y lades por i ofizi de Comun;



Tratan l'isté éson jüs inant cun i laurs da fá danü les sis de lëgn incër i raiuns de respet y de sconanza dles fontanes dl'ega da bëre.

- Apoteca Alta Badia S.n.c.: 458,00 euro por sistemé y mudé fora patüc scadü tles cassëtes de pröm aiüt;
- Amonn Office GmbH: 124,50 euro por atualisé les tarifes dla posta sön la mascin da franché 2022;
- Castlunger Alfred: 6.096,00 euro por laurs de manutenziun pro les scores y scolines de Badia, La Ila y San Ciascian – isté 2022;
- Castlunger Alfred: 6.060,00 euro por laurs de manutenziun tla scora mesana a La Ila – isté 2022;
- Profis Pulish de Jolanda Iori: 1.800,00 euro por puzené la nodadoia a La Ila;
- Ladinaservice S.a.s.: 5.000,00 euro por le sorvisc da puzené les seles publiches „Capanna Alpina“, material de consum y da puzené lapró – sajun da d'isté 2022;
- TPA GmbH: 3.312,00 euro por na racoiüda edemalla implü dl cartun tl Comun de Badia tla perioda 07/2022-12/2022;
- Kröll Richard: 1.080,00 euro por puzené fora condütes dles eghes pazes y büjes de purgaziun;
- Hell Profitechnik GmbH: 29.000,00 euro por l'imprèst de n meso multifunzional JCB Faster 4220 por 5 mëisc (dai 15.11.2022 inant);
- Frenademetz Abel: 2.800,00 euro por le sorvisc da puzené fora les sales dal'ega do la strada che vá da San Linert cina sö La Crusc – isté 2022;
- Adang Hometech S.r.l.: 584,06 euro por ciaré do la staziun de mantignimënt dla presciun dl telescialdamënt;
- Electro Ladinia S.r.l.: 10.048,15 euro por sistemé n cheder dal strom tla scora mesana a La Ila;
- Inj. Günter Dichgans: 3.000,00 euro por prestaziuns techniches por sistemé 4 plazes dai jüc dl Comun;
- Bauholz KG: 7.830,00 euro por materiali da fá danü les sis ti raiuns de sconanza dles fontanes dl'ega da bëre tles localitès de Pescol y Sponata;
- Inj. Fritz Starke: 6.713,84 euro por le stüde de fatibilitè y le proiet preliminar da realisé na condüta de coliamënt danter na fontana nöia de Valparola y la vasca dl'ega da bëre Sas Dlacia;
- Impianti Colfosco S.p.a.: 5.862,14 euro por giara y saurun da cuncé fora la strada danter Costa y Groenes;
- Studio Archea: 3.600,00 euro por la proietaziun y direziun di laurs da realisé le toch de tretuar tla zona Berto a San Ciascian;
- Miribung S.a.s. de Miribung Guerrino & Co.: 3.434,00 euro por fá sö n mür de pera do le rü Ciajó a Badia;
- Miribung S.a.s. de Miribung Guerrino & Co.: 10.844,00 euro por fá sö n mür de pera do la strada Fussé – rü da Pez a Badia.



Tratan l'istè el gnü fat deplü laurs de proteziun zivila. N tal é ince sté le laur pro le rü Marin a La Ila: canch'al vëgn de gragn temporai porta chësc rü cotan d'ega y devënta insciö n prigo por les ciases. Do avëi ciafé les autorizaziuns y i finanziaimënc éra jüda da sistémé le rü y mëte al sigü les ciases dal'ega.

Sentada di 10.08.2022

Al é gnü tut a conescënza l'Acordanza de compart por i dependënc di Comuns, dles Comunités comprensoriales y dles A.P.S.P. dla Provinzia autonoma de Balsan di 28.07.2022.

Al é gnü aprové la domanda de Herbert Irsara da podëi mudé la linia de frabricaziun mascima y la spersa curida sön le lot S dla zona d'espansiun por insediamënc produtifs La Ila II a La Ila, aladò dla documentaziun laurada fora dal arch. Karl Heinz Kastlunger y tuta sö tl protocol dl Comun ai 13.06.2022 al nr. 8779.

Al é gnü aprové la domanda de Antonio Trovò che reverda la previjiun da anuzé le bonus energia, aladò dl decret dl presidënt dla Junta provinciala di 20.04.2022 nr. 16 y mudaziuns suandëntes, sön le lot C dla zona residenziala C1 „Berto“ a San Ciascian, aladò dla documentaziun laurada fora dal arch. Emanuel Kostner y tuta sö tl protocol dl Comun ai 16.06.2022 al nr. 9021.

Al é gnü tut a conescënza la lëtra di 30.05.2022 di gesturs di eserzizi ti raiuns da jí coi schi sön le plateau danter Piz La Ila, Piz Sorega y Pralongiá, cun chëra ch'ai á comuniché da orëi se trá zoruch dala convenziun di 14.11.2017 por la realisaziun dles infrastrotöres dl'ega da bëre ti raiuns interessá. Porchël é gnü aprové da ti paié zoruch ai gesturs dles üties da munt la pert dla soma ch'ai á paié ite surafora de 11.199,68 euro, aladò dl art. 6 dla convenziun. Al é spo gnü fat fora da stlü jö la proietaziun por la realisaziun dles infrastrotöres dl'ega da bëre ti raiuns da jí coi schi tl raiun danter Piz La Ila, Piz Sorega y Pralongiá cun l'elaboraziun dl proiet definitiv che é bele gnüda fata.

Al é gnü aprové le 2. proiet d'injunta y de varianta di 08.08.2022 che reverda la costruiziun dl cantier de Comun tla localitè Sompunt, aladò dla documentaziun laurada fora dal proietant y direttur di laurs inj. Roman Rives, da chëra ch'al resultëia n cost indöt de 3.461.118,90 euro.

Sentada di 23.08.2022

Al é gnü aprové le verbal dla comisciun de valutaziun 18.08.2022 por tó sö na bidela dla scolina de Badia y da nominé Paola Frenademez sciöche davagnadëssa dl concurs scrit fora. Al é porchël ince gnü aprové da tó sö Paola Frenademez tla II. cualifica funzionala – tēmp parzial al 57,89% por 22 ores al'edema, dai 05.09.2022 ai 16.06.2023.

Al é gnü tut a conescënza l'Acordanza de compart di 08.08.2022 por i dependënc di Comuns, dles Comunités comprensoriales y dles A.P.S.P. dla Provinzia de Balsan che reverda le contrat por i sorvisc soziai.

Al é gnü aprové da ti surandé l'inciaria dl **sorvisc da verdastrada por scolars** por l'ann de scora 2022/2023, plü avisa dai 05.09.2022 ai 16.06.2023, a **Giorgio Corazzin, Gilbert Irsara, Nino Mura y Renato Ploner**. L'indenitè forfetara aprovada é de 15,00 euro lordo por intervënt (vigni iade 30 menüc) che gnará paiada fora cun la detrata d'acunt dl 20%.

Al é gnü tut a conescënza le protocol di 16.08.2022 dl'autoritè de gara por dé ia i laurs da ciavé sö y mëte jö i ros y i pa dles löms por **mioré l'efiziënza energetica dl implant de iluminaziun publica do la strada comunala Ninz a La Ila** y da ti surandé l'inciaria ala dita Miribung S.a.s. de Miribung Guerrino & C. da La Val. La spëisa aprovada é de 57.593,70 euro + 10% CVA.

Al é gnü aprové da azeté dala Provinzia autonoma de Balsan les parzeles de proprietè dl Demane provincial che formëia le tretuar do la SS 244 dla Val Badia (danter le km 28+000 y le km 28+500), plü avisa les parzeles tl C.C. Badia formades danü cun le plann de frazionamënt nr. 5075/2022 lauré fora dal geom. Mauro Crepaz: p.d.t. 3085/2 (394 m²), p.d.f. 723/5 (66 m²) y p.d.t. 3067/23 (99 m²).

Al é gnü aprové da ti vëne al'Interessenza Elettrica Vicinia Armentarola la p.d.f. 2358 cun na spersa de 84 m² tla P.T. 903/II C.C. Badia, por regularisé la proprietè dl terac olach'al é gnü fat sö la ciasa dla scora de schi da San Ciascian. Aladò dla valutaziun dl geometer de Comun Walter Rungger di 08.08.2022 é gnü sciazé n valur complessif dl terac de 73.920,00 euro (880,00 euro/m²) + 22% CVA. Dötes les spëises por stlüje jö, registré y intavolé le contrat tl liber fondiar é a pëis dla pert che cumpra.

Al é gnü aprové da ti surandé ala APR Group S.a.s. de Rives Roman & C. l'inciaria por les prestaziuns techniches tla fasa de proietaziun y esecuziun che reverda la realisaziun de na strada d'azes pormez al cantier de Comun cun zona de recycling tla localitè Sompunt. La spëisa aprovada é de 14.728,81 euro + 4% CNPI + 22% CVA, aladò dl'offerta di 02.08.2022.



Chêsc altonn éson jüs inant cun i laurs por taché ite la zona por le frabiché alisiré de Pantansaré tla rëi dles infrastrotôres comunales.

Al é gnü aprové da surandé chëstes inciaries por laurs, prestaziuns de sorvisc y condütes de material en economia:

- Ladiniaservice S.a.s.: 3.240,00 euro por le sorvisc ordinar da puzené les seles publiches pro le garage Bosco Verde a San Ciascian dai 14.06.2022 ai 30.09.2022;
- Costa Maria Cristina: 7.000,00 euro por lí jö i cumpeadus dl'ega da bëre por l'ann 2022;
- Gasser S.r.l.: 3.208,16 euro por laurs da cuncé le camion cun targa BS016PS;
- Valentin Elmar: 1.723,44 euro por laurs da cuncé y mudé fora toc pro deplü mesi de Comun;
- Termo A. Clara: 970,00 euro por mudé fora n toch pro la cialdira dl implant da scialdé – ciamp dal sport da San Ciascian;
- Bautechnik: 1.197,00 euro por ros dal'ega da mudé fora tla localitè Costadedoi;
- Studio Archea: 175,68 euro de import integratif por i contribuc de ponsiun pro le laur de proietaziun y direziun di laurs da fá le toch de tretuar tla zona Berto a San Ciascian.

Al é gnü aprové la delimitaziun dles sperses da taché sö reclams por les lites dla Ciadena di Deputac y dl Senat dla Republica di 25.09.2022.

Sentada di 31.08.2022

Al é gnü aprové le stat final di 21.07.2022 y le certificat d'esecuziun regulara di laurs di 22.07.2022 por la manutenziun straordinaria de strades y plazes de Comun – ann 2022 – por na soma de 240.704,53 euro indöt, aladö dla documentaziun laurada fora dal direttur di laurs inj. Emerich Pedratscher y sotescrita zënza contestaziuns dala dita Cadore Asfalti S.r.l. che á fat i laurs.

Sentada di 07.09.2022

Al é gnü aprové la proposta de risposta da ti presenté al Consëi de Comun, cun chëra ch'al vëgn refodé i recurs presentá da Sigrid Piccolruaz y Claus Fistill cuntra la delibera dl Consëi nr. 16 di 29.07.2022, aladö dl art. 5, coma 4, dl Regolamënt comunel (por informaziuns plü menüdes ciara a plata 7 de chësta ediziun dl EHO).

Al é gnü aprové da surandé chëstes inciaries por laurs, prestaziuns de sorvisc y condütes de material en economia:

- Electro Shop S.r.l.: 73,69 euro por na tle USB por la scolina da La Ila;
- Rollmark S.r.l.: 230,00 euro por cuncé le raffstore dla scolina da La Ila;
- Iori Jolanda – Profis Pulish: 5.400,00 euro por romené sö y puzené coch'al alda les scolines ala fin dl isté 2022;
- Electro Ladinia S.r.l.: 281,07 euro por laurs da sistemé i cabli dla TV tla scora elementara a La Ila;
- Südtirol Fenster S.r.l.: 139,00 euro por laurs de manutenziun y regolaziun dles finestres dla scora mesana a La Ila;
- Ress Multiservices: 90,12 euro por material da puzené la nodadoia a La Ila;
- ZR Detersivi S.a.s.: 620,00 euro por ipoclorit por la nodadoia a La Ila;
- Mp Office S.a.s.: 3.245,40 euro por tofles de metal dla sort B unilaterales por taché sö le reclam politich en previjiun dles lites politiches di 25.09.2022;
- Electro Ladinia S.r.l.: 435,00 euro por taché ite la fira de spidl tl local di server tla pröma alzada dla Ciasa de Comun;
- Electro Ladinia S.r.l.: 3.486,27 euro por taché ite i **access point** por le WI-FI tla scora elementara de Badia;
- Decor S.r.l.: 5.630,00 euro por na bacheca nöia y por panei che assorbësc le sonn;
- Electro Ladinia S.r.l.: 1.955,51 euro por atacs por i pulc nüs tla scora elementara da La Ila;
- Ress Multiservices: 3.935,27 euro por na mascin da lavé func „Taski Swingo“ por la nodadoia a La Ila;
- Crepaz Jan Daniel: 2.498,00 euro por mosoré fora y fá na planimetria cuotada por la costruziun de na nodadoia nöia;
- Aquatherm GmbH: 2.483,15 euro por cumpedatus dal'ega Maddalena;
- Weger Walter GmbH: 3.617,00 euro por na capa d'aspiraziun por le cantier nü de Comun a Sompunt;
- Alpineservice KG: 2.050,21 euro por coronas da mëte tl cantier de Comun a Sompunt.

Al é gnü aprové da ti afité a Tommaso Paolo Chianura l'abitaziun de 37,40 m² tl frabichat dla scora elementara a San Ciascian (str. Micurá de Rü 44 – p.d.f. 1299 tl C.C. Badia), dai 07.09.2022 cina ai 30.06.2023. L'afit al mëis é de 266,00 euro che coresogn al afit provincial, implü cun

na retüda dles spëises de scialdé, ega cialda y forza elettrica determinades tla forma forfetara de 209,00 euro. Dötes les spëises de contrat, lapró la cuta de register, vá a pëis dl afitadin.

Al é gnü aprové le 1. stat d'avanzamënt „straordinar“ di 12.08.2022 che reverda i laurs fac y contabilisá tl 1. semester 2022 por la sistemaziun dl let dl rü Marin a La Ila, cun na soma de 78.512,87 euro. Al é ince gnü aprové da ti reconesce y paíe ala dita Verginer Bau S.r.l. & C. S.a.s. la soma de 3.685,79 euro + 22% CVA implü en confrunt a chëra preodüda por le 1. stat d'avanzamënt „ordinar“.

Sentada di 14.09.2022

Al é gnü aprové da azeté dala Provincia autonoma de Balsan y da surantó debann les parzeles de proprieté dl Demane dles eghe provincial che formëia le toch nü de tretuar do la SS 244 dlungia le punt da Pedraces y plü avisa les parzeles tl C.C. Badia formades danü cun le plann de frazionamënt nr. 1027/2020, lauré fora dal inj. Johann Röck: tla P.T. 323/II C.C. Badia: p.d.t. 5408/25 (134 m²), p.d.t. 5408/27 (8 m²) y p.d.t. 5408/28 (213 m²).

Al é gnü aprové da inciarié cun prescia la dita Brunner & Leiter S.r.l. de L'Aurin da fá i intervenc nezesciars por mëte al sigü dal prigo de peres la strada danter Jusciara y Crafunara, aladô dl proiet aprové cun la deliberaziun nr. 111/2021. La spëisa aprovada é de 294.214,92 euro indöt.



Gran pert dles mascins de Comun é sëgn bele tles garage dl cantier nü a Sompunt, olach'an á intratan arjigné ite feter döt cich'an adora por le sorvisc da desparé, lapró le logher dal saurun y dal se.



Al é gnü aprové le proiet esecutif lauré fora dal inj. Roberto Ricci Maccarini por fá danü le punt de lëgn sura la Gran Ega tla zona Damez por chi che vá a pe y cun la roda. La spëisa odüda dant da fá le punt é de 165.235,35 euro indöt.

Al é gnü aprové da ti surandé a Giulia Barp da Milan l'inciaria da gestí, romené sò y ciaré sura la nodadoia dla scora mesana da La Ila tratan l'altonn 2022 (dai 21.09.2022 ai 14.12.2022), por n paiamënt de 150,00 euro al de (zënza CVA), aladô dl'oferta di 05.09.2022.

Sentada di 21.09.2022

Al é gnü aprové le program de laur 2021-2022 che reverda le proiet Comun Clima y che é gnü tut sò tl program d'archiviaziun digital dl Comun al nr. A600469038.

Al é gnü aprové la documentaziun laurada fora dal inj. Emerich Pedratscher por l'ocupaziun temporana di terac, tuta sò tl protocol dl Comun ai 15.09.2022 al nr. 18223, por podëi fá i laurs da sistemé y mëte al sigü la strada danter Jusciara y Crafunara da lëgns y peres che vëgn jö demeztrú. Le cost aprové por l'ocupaziun temporana dl terac é de indöt 4.016,10 euro + CVA eventuala.

Sentada di 28.09.2022

Al é gnü aprové da cumpré se da sterne tres le portal dl'Agenzia provinciala por i contrac publics (ACP) sön la basa dla convenziun-cheder denominada „Se da strada – terza ediziun“. Al é spo gnü fat fora da ti surandé ala dita Impianti Colfosco S.p.a. da Corvara l'inciaria da condüje le saurun da ingiaré por la sajun da d'invern 2022/2023 por n prisc de 30,21 euro/m³ (20,14 euro/ton) da jí a le tó te ciavara y de 38,29 euro/m³ (25,37 euro/ton) da le lascé condüje, aladô dl'oferta di 31.08.2022. La spëisa preodüda y aprovada é de 20.000,00 euro tl ann 2022 y de 47.000,00 euro tl ann 2023.

Al é gnü aprové la domanda de Erich y Alois Frenademetz da podëi mudé la linia de frabricaziun mascima sön i loc Q y R dla zona residenziala C1 „San Linert“, aladô dla documentaziun laurada fora dal arch. August Gasser y tuta sò tl protocol dl Comun ai 18.11.2021 al nr. 22592.

Al é gnü aprové da ti assegné a Enrico Mangutsch, cun contrat de venüda, la p.d.t. 4463/26 (11 m²), la p.d.t. 4465/34 (2 m²) y la p.d.t. 4465/35 (2 m²) tla P.T. 105/II C.C. Badia, por n prisc indöt de 13.200,00 euro (800,00 euro/m²). Dötes les spëises por stlüje jö, registré y intavolé le contrat tl liber fondiari é a pëis dla pert che cumpra le terac.

Sentada di 05.10.2022

Al é gnü aprové da surandé chëstes inciaries por laurs, prestaziuns de sorvisc y condütes de material en economia:

- I&S Ingegneria e Sicurezza: 732,00 euro por controis periodics y straordinars di lifc tla Ciasa de Comun – ann 2023;
- Dario Taraboi: 152,00 euro de spëisa implü por le laur da ciaré sura la nodadoia a La Ila;
- Farmacia Alta Badia: 90,98 euro por clor por resservars dl'ega da bëre de Comun;
- Steff's Aussengestaltungen – Mayr Stefan: 2.315,00 euro por laurs da sposté na tofla, cuncé la stiga de dljia a San Linert y mëte jö sales dal'ega tla str. Run-cac a Badia;
- SAM GmbH – Südtiroler Agrar Maschinenringservice: 2.000,00 euro por prestaziuns sön cherdada cun tractor y binda o d'atres atrezadöres azessoras por la manutenziun ordinara de strades y infraströtes de Comun – ann 2022;
- Hell Profitechnik: 5.833,84 euro por cuncé y mudé fora n toch pro le Multicar Tremo Carrier S.;
- Impianti Colfosco S.p.a.: 2.202,99 euro por cuncé y mudé fora n toch dla bëna sön la pachera Kramer 880;
- AOM Manufaktur S.r.l.: 14.674,00 euro por mudé fora la porta d'entrada prinzipala dla scora elementara de Badia;
- Edyna: 1.983,19 euro por n contrat nü de fornidöra permanëta de forza elettrica – str. Pre de Vi.

Sentada di 12.10.2022

Al é gnü aprové le proiet lauré fora dal inj. Sergio Tiezza y presenté dala Sciovie Gardenaccia S.p.a. por deslarié la pista dai schi „Gardenaccia B” y fá na strada de coliamënt coi schi cun la pista „Gardenaccia A”, aladô dla documentaziun tuta sö tl protocol dl Comun ai 08.09.2022 al nr. 17792.

Al é gnü aprové la domanda de Oskar Pescollderungg da podëi mudé la linia de frabicaziun mascima sön la unità 35 dl raion da abité A2 „La Ila 1+2” a La Ila, aladô dla documentaziun laurada fora dal arch. Erwin Fistill, tuta sö tl protocol dl Comun ai 31.08.2022 al nr. 17353.

Al é gnü aprové da ti surandé ala dita Amonn Office S.r.l. da Balsan l'inciaria da organisé le sistem de stampa y de comunicaziun d'ofize, por la fornidöra de mascins y por les prestaziuns de sorvisc tla sënta prinzipala dl Comun, tl ofize dla Polizia de Comun, tl cantier, tles scolines y tles biblioteches dl Comun, aladô dl'oferta di 28.09.2022, por la perioda 01.12.2022 – 30.11.2025. La spëisa aprovada



Les spëises por le desparé odüdes danfora por la sajun 2022/2023 é de 240.000,00 euro indöt. Implü ól ester bindebó de soma da curí les spëises de manutenziun di veicui. Do passa 20 agn é ince gnü cumpré n UNIMOG nü por 420.000,00 euro.

é de 9.180,00 euro + 22% CVA al ann por trëi agn indöt. Al é gnü aprové la domanda de Norbert Valentin da podëi mudé la zona de residënza C1 „Parvela”, cun n ampliament dla spersa de 80 m² y n aumënt dla densité de frabicaziun mascima da 1,60 m³/m² a 2,00 m³/m², aladô dla documentaziun laurada fora dal arch. Christian Agreiter y tuta sö tl protocol dl Comun ai 03.10.2022 al nr. 19112.

Al é gnü aprové da ti surandé ala dita Amonn Office S.r.l. da Balsan l'inciaria da organisé le sistem de stampa y de comunicaziun d'ofize, por la fornidöra de mascins y por les prestaziuns de sorvisc tla sënta prinzipala dl Comun, tl ofize dla Polizia de Comun, tl cantier, tles scolines y tles biblioteches dl Comun, aladô dl'oferta di 28.09.2022, por la perioda 01.12.2022 – 30.11.2025. La spëisa aprovada é de 9.180,00 euro + 22% CVA al ann por trëi agn indöt.

Al é gnü aprové le 2. proiet d'injunta y de varianta cun data agost 2022 por le ressanamënt dles condütes dales eghes pazes La Crusc – San Linert, aladô dla documentaziun laurada fora dal direttur di laurs inj. Markus Pescollderungg cun na spëisa lorda de 481.235,63 euro indöt. En confrunt al 1. proiet d'injunta y de varianta vëgnel porchël fora na maiú spëisa de 22.343,29 euro + 10% CVA por i laurs da fá y de 5.682,50 + 4% CNPI + 22% CVA por les prestaziuns techniches.

Al é gnü aprové da inciarié chëstes dites y chisc colauradus da defora da fá **sorvisc desvalis da desparé tre-tuars, strades y plazes de Comun tratan la sajun da d'invern 2022/2023:**

- Impianti Colfosco S.p.a.: 235,00 euro/ora – pachera cun ciafer; 116,00 euro/ora campion da mené demez nëi cun ciafer;
- Irsara Goffredo S.n.c.: 160,00 euro/ora – pachera cun bëna y ciafer; 175,00 euro/ora pachera cun bëna a spiz y ciafer; 135,00 euro/ora – camion cun gru y cëst

cun ciafer; 50,00 euro/ora – laurant por desparé a man y/o cun fresa a man de Comun;

- Bauholz S.a.s.: 48,00 euro/ora por ciafer cun patent „C“ da jí cun le meso de Comun;
- Samuel Pitscheider: ciafer cun patent „C“ por jí cun le meso de Comun – prisc forfetar de 12.500,00 euro por la perioda dal 01.11.2022 ai 31.03.2023;
- Dita Alfreider Robert: pachera cun bëna y ciafer – prisc forfetar fis de 12.000,00 euro, che coresogn a 100 ores de laur tla perioda dal 01.12.2022 ai 31.03.2023; 120,00 euro/ora – pachera cun bëna y ciafer por les ores implü;
- Electro Ladinia S.r.l.: 49,00 euro/ora – ciafer por maschin de Comun;
- Frenademetz Florian: 105,00 euro/ora brutto sciöche laur autonom ocajional, cun tractor y ciafer;
- SAM – Südtiroler Agrar Maschinenringservice S.r.l.: 93,00 euro/ora cun tractor y ciafer; 35,00 euro/ora – laurant cun siëia a motor; 78,00 euro/ora – tractor cun atrezadöra azessoria lapró;
- Valter Burino: 22,00 euro/ora brutto sciöche laur autonom ocajional por desparé a man;
- Pietro Frenademez: 22,00 euro/ora brutto sciöche laur autonom ocajional por desparé a man;
- Christoph Pezzedi: 22,00 euro/ora brutto sciöche laur autonom ocajional por desparé a man.

La spëisa preodüda y aprovada por i laurs da desparé é de 80.000,00 euro por l'ann 2022 y de 120.000,00 euro por l'ann 2023.

Al é gnü aprové da surandé chëstes inciaries por laurs, prestaziuns de sorvisc y condütes de material en economia:

- Mp Office KG: 720,00 euro por set complec de 2 linzos + ziscia + peza da mans da adoré un n iade por i locai olach'al vëgn tigní les lites;
- Amonn Office S.r.l.: 106,25 euro por tinta por la maschin da franché;
- Adang Hometech: 3.447,52 euro por laurs de manutenziun ordinara pro la nodadoia a La Ila;
- Hultafors Group Italy S.r.l.: 1.937,59 euro por quant da d'invern por i lauranc de Comun;
- Auto Alta Badia S.r.l.: 1.145,47 euro por laurs da cuncé y mudé fora toc pro le meso VW Crafter cun targa FT139JP;
- Valentin Elmar: 9.444,06 euro por laurs desvalis da cuncé y mudé fora toc pro i mesi de Comun – perioda agost/setëmbër 2022;
- Aquatherm S.r.l.: 20.000,00 euro por na inciaria implü por material idraulich;
- Tyrolplast GmbH: 1.841,40 euro por la cumpra de material idraulich;
- Staudacher OHG: 12.527,84 euro por na cadrëia spizada Vario por le meso Schäffer;
- Geom. Mauro Crepaz: 1.575,00 euro por mosoraziuns y redaziun dl plann de frazionamënt por le ba-

rat de terac cun Luca Crazzolaro – inciaria implü.

Al é gnü aprové le proiet lauré fora danü dal inj. Maurizio Kastlunger por la trasformaziun dla canalisaziun moscedada te na canalisaziun despartida por eghes blances y fosces a La Ila – lot IV Boscdaplan – coliamënt cun la condüta prinzipala. La spëisa preodüda y aprovada por i laurs da fá é de 839.204,72 euro indöt.

Sentada di 19.10.2022

Al é gnü aprové la sciazada di cosc atualisé aladô dla lista di prisc de referimënt dla Provinzia 2022-bis por i laurs da mëte al sigü la strada danter Jusciara y Crafunara, aladô dla documentaziun laurada fora dal inj. Emerich Pedratscher cun n cost atualisé de 527.159,96 euro indöt.

Al é gnü aprové da ti afté a Maria Chiara Sintoni l'abitaziun de 47,50 m² tl frabicat dla scora elementara a San Ciascian (str. Micurá de Rü 44 – p.d.f. 1299 tl C.C. Badia). Aladô dles clausoles de contrat aprovades ti vëgn l'abitaziun aftada por 1 n ann, dal 01.11.2022 inant, cun la poscibilité da arlungé la dorada cina n mascim de 4 agn. L'afit é de 91,00 euro al mëis che coresogn al afit sozìal, cun na retüda de spëises de scialdé, ega cialda y forza eletrica determinades tla forma forfetara de 209,00 euro al ann. Dötes les spëises de contrat, lapró la cuta de register, é a pëis dl afitadin.

Sentada di 26.10.2022

Al é gnü aprové la nota onorara di 10.10.2022 dl inj. Maurizio Kastlunger por les prestaziuns tecniches tla fasa de proietaziun por i laurs da trasformé la canalisaziun moscedada te na canalisaziun despartida por eghes blances y fosces a La Ila – abinadú prinzipal, cun na soma de 26.788,17 euro + 4% CNPI + 22% CVA.

Al é gnü aprové da ti surandé al tecnich Stefan Gasser da Porsenú l'inciaria da fá na valutaziun ambientala strategica por la redaziun dl program comunal de svilüp por le raiun y la contrada. La spëisa aprovada é de 12.500,00 euro + 4% CNPI + 22% CVA aladô dl'oferta di 09.09.2022.

Al é gnü aprové da surandé chëstes inciaries por laurs, prestaziuns de sorvisc y condütes de material en economia:

- Ristorante Bar Saré S.a.s. de Pezzedi Marco & C.: 410,82 euro por na marëna en ocajiun dla mëssa di 27.08.2022 tla cortina di soldas de Valparola;
- Mp Office S.a.s.: 1.267,72 euro por material da puzené y da lié i ac de stat zivil;
- Crazzolaro Christian – Hotel Service: 210,57 euro por

- laurs da cuncé mascins de ciasadafüch dles scolines de Badia y San Ciascian;
- Crazzolar Christian – Hotel Service: 96,00 euro por laurs da cuncé mascins de ciasadafüch dla scora mesana a La Ila;
 - Adang Homotech: 3.671,33 euro por laurs da despifé les condütes dal’ega paza a Funtanacia;
 - Datatraffic GmbH: 95,00 euro por 50 aneles zinca-des D. 48 da fissé les stanges dla strada;
 - Iredeem: 696,00 euro por mudé fora patris dl sistem de control a destanza di defibriladus;
 - MET S.r.l.: 3.547,35 euro por laurs da taché ite la fra de spidl te n frabricat a San Ciascian – str. Pre de Vi 47;
 - Elektro Dapoz S.n.c.: 327,05 euro por na dlaciadoia por öna dles abitaziuns tla ciasa dla scora elementara a San Ciascian;
 - Crazzolar Christian – Hotel Service: 2.508,00 euro por na mascin da impasté da 9,5 l por la scolina da San Ciascian;
 - Frenademez Alberto: 3.019,70 euro por laurs de manutenziun straordinaria dl implant da scialdé dla sco-

- ra y scolina da San Ciascian;
- Termo Dapoz S.r.l.: 69,00 euro por materiali de manutenziun pro la condüta dal’ega paza Costa;
 - Intercom Dr. Leitner GmbH: 1.710,00 euro por n injin da sterne da mëte sön l’Unimog y na curidöra por pricia;
 - Tecnomag GmbH: 3.023,39 euro por 6 bares da sferié jö les lames dles cadrëies;
 - Adang Homotech: 17.274,85 euro por n agregat da fá strom „Galaxy“ cun schedes tecniches por le cantier de Comun a Sompunt;
 - Dadò Ricambi S.r.l.: 11.825,00 euro por 10 pers de morones por i mesi de Comun;
 - Geom. Palfreder Helmuth: 1.900,00 euro por mosoré do la planimetria y lauré fora n plann de frazionamënt por l’architada dl bus tla localitè Damez;
 - Adang Homotech: 1.180,00 euro por mudé fora n radiadú tla sela dla Crusc Blanca a La Ila;
 - Auroport GmbH: 39.000,00 euro por mudé fora les gran portes dl magazin di stödafeuch a San Ciascian;
 - Adang Hubert: 1.794,00 euro por laurs da sistemé i urc incër l’ambulatorio da Pedraces.

MUDAZIUNS DL BILANZ DE PREVJIUN 2022

SETIMA MUDAZIUN DL BILANZ DE PREVJIUN 2022 aprovada dala Junta de Comun cun delibera nr. 165 di 07.09.2022 y ratificada dal Consëi de Comun cun delibera nr. 30 di 26.10.2022

SPËISES	
Titul I - spëises corëntes	
Retüdes de somes nia da paie o scodides surafora	150.000,00 €
D’atri sorvisc	2.000,00 €
Paia mënc	2.350,00 €
Contribuc soziai a pëis dl ënt	670,00 €
Cuta regionala sön les ativités produtives (IRAP)	160,00 €
Utënzies, tarifes y cutes	14.520,00 €
Manutenziun ordinaria de frabricac - scores y scolines	6.588,00 €
Contrac de sorvisc publich (racoiüda de refodam)	15.000,00 €
Contribuc spëises provinziales implanc de sarenaziun (art. 55 dla LP nr. 8/2002)	-10.000,00 €
Total spëises - titul I	181.288,00 €
Titul II - investimënc	
Atrezadöres	18.707,00 €
Manutenziun straordinaria Ciasa de Comun	531,00 €
Manutenziun straordinaria scores elementares	43.630,28 €
Manutenziun straordinaria de implanc sportifs	-27.721,89 €
Costruziun y manutenziun de strades y plazies	11.847,00 €
Costruziun y manutenziun straordinaria dl cantier comunal a Sompunt	1.196,61 €

Espropriaziuns y servitus desvalies	100,00 €
Total spëises - titul II	48.290,00 €
SPËISES INDÖT	229.578,00 €

ENTRADES	
Titul I-II-III	
Contribuc dal Stat por de mëndres entradas dal’IMI	29.288,00 €
Trasferimënc corënc da Ministers	2.000,00 €
Entrades da retüdes de somes nia da paie o scodides surafora	150.000,00 €
Total entradas - titul I+II+III	181.288,00 €
Titul IV	
Condons da frabiché y domandes de mëte apost en sanatoria frabricac abusifs	37.440,00 €
Contribuc por investimënc da pert dles Aministraziuns zentrales	-50.000,00 €
Contribuc dal Stat - Plann nazional de recuperada y resiliënza (PNRR)	50.000,00 €
Venüda de terac	10.850,00 €
Total entradas - titul IV	48.290,00 €
ENTRADES INDÖT	229.578,00 €

OTAVA MUDAZIUN DL BILANZ DE PREVJIUN 2022 aprovada dala Junta de Comun cun delibera nr. 184 di 12.10.2022
y ratificada dal Consëi de Comun cun delibera nr. 31 di 26.10.2022

SPËISES	
Titul I - spëises corëntes	
D'atri bëgns de consum	-14.120,00 €
Sorvisc ausiliars	200,00 €
Sorvisc por formaziun dl personal	1.000,00 €
Manutenziun ordinara y laurs da cuncé	36.434,15 €
Contrac de sorvisc publich - viabilité	60.000,00 €
D'atri sorvisc	4.466,09 €
Total spëises - titul I	87.980,24 €
Titul II - investimënc	
Retüdes de somes nia da païé o scodides surafora	15.066,00 €
Costruziun y manut. straord. dles scores elementares	-12.259,00 €
Zënter scolastich a La Ila	-69.080,15 €
Stüde Comun Clima	18.422,00 €
Costruziun y manut.straord. condütes dl'ega da bëre	26.647,00 €
Costruziun y manutenziun straordinaria dla canalisaziun (eghes pazes)	31.788,00 €
Cumpra y manutenziun de mebli, mascins y atrezadöres	15.284,00 €
Costruziun y manutenziun de strades y plazes	-11.847,00 €
Inciaries a profescionisc	1.922,00 €
Total spëises - titul II	15.942,85 €
Titul VII - spëises por cunt de terzi	
Paiamënt dla detrata dl 4% sön i contribuc publics	50.000,00 €
Total spëises - titul VII	50.000,00 €
SPËISES INDÖT	153.923,09 €

ENTRADES	
Titul I-II-III	
IMI - entrades scodides tres azertamënc cuntra l'evajiun tributara	13.074,13 €
Trasferimënc corënc da Ministers	19.754,56 €
Contribuc dal Stat por la produziun de forza eletrica (GSE) - fotovoltaich Badia	5.000,00 €
D'atri trasferimënc corënc da dites	14.388,60 €
Entrades da dërc de secretariat - Ofize tecnich	16.728,15 €
Conzesciuns y dërc reai de godimënt	6.411,56 €
Entrades da straufunghes	5.800,24 €
Retüdes dal'assiguraziun por dagns	6.823,00 €
Total entrades - titui I+II+III	87.980,24 €
Titul IV	
Contribuc sön investimënc da d'atri Comuns	2.126,35 €
D'atri contribuc dala Provinzia	13.816,50 €
Total entrades - titul IV	15.942,85 €
Titul IX	
Detrata dl 4% sön contribuc publics	50.000,00 €
Total entrades - titul IX	50.000,00 €
ENTRADES INDÖT	153.923,09 €

NONA MUDAZIUN DL BILANZ DE PREVJIUN 2022 aprovada dal Consëi de Comun cun delibera nr. 32 di 26.10.2022

SPËISES	
Titul I - spëises corëntes	
Descriziun	Import
Spëises Covid-19	7.737,85 €
Total spëises - titul I	7.737,85 €
Titul II - investimënc	
Retüdes de somes nia da païé o scodides surafora	1.325,23 €
Atrezadöres	3.459,00 €
Manutenziun straordinaria dles scolines	2.512,00 €
Manutenziun straordinaria dles scores elementares	1.173,00 €
Zënter scolastich a La Ila	-148.684,87 €
Inciaries a profescionisc	18.271,00 €
Ressanamënt y trasformaziun dla canalisaziun moscedada te na canalisaziun despartida por eghes blances y fosces	12.911,00 €

Cumpra y manutenziun de mebli, mascins y atrezadöres	41.279,00 €
Manutenziun straord. sënta dla Crusc Blanca a La Ila	1.440,00 €
Manutenziun straord. magazin Stödafüch a S. Ciascian	64.125,64 €
Manutenziun straord. ambulatorio dl dotur a Pedraces	2.189,00 €
Total spëises - titul II	0,00 €
SPËISES INDÖT	7.737,85 €

ENTRADES	
Titui I-II-III	
Contribut provincial Covid-19 (art. 181 D.L. 34/2020)	7.737,85 €
Total entrades - titui I+II+III	7.737,85 €
ENTRADES INDÖT	7.737,85 €

Turism y mobilité tl raiun alpin

Bele de jená á Thomas Bausch, professur inciarié dal Zënter de Competënza por turism y mobilité dl'Universitè de Balsan, presenté te Junta i resultac parziai dl'inrescida sön le turism y la mobilité tl raiun alpin, en pert ince finanziada dal Comun de Badia.

Le prof. Bausch á splighé en cört i fins dl Zënter de competënza dla UNIBZ, da se dé jö cun argomënc che á da nen fá cun Südtirol, y te chësc caje specifich cun inrescides tl ciamp dl turism. Ara nen vá de cherié na plataforma por analisé tematches/problems che á da nen fá cun le svilup turistic. Porimpó ne n'ê i compic atira nia daldöt tlers: an á metü man da chirí colauradus scientifics, metü sö n Comité scientific (06.2020) y spo án definí temesc y proieci, cun stüdi empirics (intervistes a ghesc/turisc, nivel de contentëza/sodesfaziun di ghesc y i.i.). Man man él spo ince gnü fat evaluaziuns da pert de scienziá de d'atri Stac.

Ejëmpli de laur

An s'á fat domandes coche: Ci capëscion pa sot a „sostignibilitè”? Ci óra pa dí por la jënt dl post y ci pa por i turisc?

Al é gnü fora de gran desfarënzies danter ghesc che vëgn da Stac desvalis, danter ëi y ères: **olá é pa le problem, ci soluziuns pón pa ciáfè?** Les respostes dades é scialdi desvalies y porchël pón ince se damané sce la sostignibilitè é na cossa individuala (al basta ch'ara me vais bun a me) o sc'ara reverda döta la sozieté.

D'atres domandes ch'an s'á fat: **Tan importanta é pa la mobilité sostenibla? Él important da consumé produc locai por sparagné iadi y incuinamënt? Canch'i vá en vacanza, vái cun mi auto o toli/podessi tó mesi publics?** Ci n'é pa nia sostenibl? Ince chiló é les minunghe scialdi desvalies: por la maiü pert é ma i iadi lunc cun la barca n problem, le rest tröp demanco.

Al é ince gnü porté inant n dialogh cun la IDM (*Innovators. Developers. Marketers*) Südtirol, che dess daidé sensibilisé i ghesc, nia ma cun val' sort de certificac che confermëia la cualité de valch. An mëss ciaré concretamënter dla sostignibilitè di produc y i.i. y ince la comuniché!



Fotografies tl reclam turistic


Vigni ann vëgnel fat reclam cun de vigni sort de mesi y dantadöt cun fotografies. Mo ci vëiga pa pordërt i turisc, co toli pa sö les imajes, ciünes emoziuns vëgnel pa descedé?

Al é gnü damané fora passa 400 ghesc: ai messâ comenté les fotografies de reclam dl raiun y dí ci ch'al ti tomâ ite canch'ai ti ciarâ, sc'ares â na faziun positiva o nia. Olach'al é massa jënt sön la fotografia é la reaziun scialdi negativa: „**overcrowding**” = massa jënt, massa plëgn, turism de massa y i.i. Al pó ince ester che do la pandemia foss les reaziuns de chësc vers stades ciámó plü negatives.

Les fotografies de „**downhill**” cun la roda á ince descedé reaziuns plütosc negatives: tröc á albü l'impresciun de n turism olach'al n'é nia pesc y tranquilité da podëi palsé, mo plütosc prigoros da rodé a pe, da gní mená sot y i.i.

Fotografies de lersc zënza odlina d'invern é gnüdes odüdes da tröc coche imajes de bosc che mör jö, ince sc'ara se trata te chësc caje de interpretaziuns falades. I bosc rosedá dal gran vënt y dales rogossies di ultimi agn o siciá por gauja dl chefer dla scorza é spo ciámó n ater capitul.

Interessant él ince da odëi che fotografies de porsones sores amesa na contrada da nëi á descedé te zacotan de caji tēma da ester da susc amesa le nia.



Fotografies de turism cun la roda

Le **turism cun la roda** é na tematica che vëgn tres plü sterscia y che se ghira ince respostes por le dagní. Le prof. Bausch spliga ch'al é plütosc püc dac por podèi fá analyses menüdes y capí por ejempl tanc che fej iadi plü lunc cun la roda. Chèsta é na categoria che crësc vigni ann deplü y che rapresentèia ince n potenzial por nosc raiun. D'atri vá spo cun la roda da strada, ciamó d'atri cun chëra da munt o cun la e-bike, n meso ch'an vëiga tres deplü do i trus jö tla val y ince sò por munt. Tl dagní messaràn ciaré da cherié percurs rerservá por chi che vá cun la roda y d'atri por chi che vá a pe o despartí sciöch'al alda chi plü lerc, olache trames les categories á lerch. Te tröc posc turistics án bele metü man dan da agn da lauré de chësc vers.

Coche d'atri fej ince le Zënter de competënza stüdi sön les trasses che chi dala roda tol, por capí tan lunc ch'ai vá, olach'an vá cun ciüna sort de roda, sc'ai vá cun la roda a lauré o por fá sport, olá pón pa ciarié sò les rodes eletriches y i.i. Al vëgn tut ca dac GPS da deplü aplicaziuns por fá na evaluaziun de cer raiuns, coche p.ej. la cité de Bornech, cun chëra ch'an podará spo valuté ci ch'an pó döt mioré, ci mosöres che vá bun y ciünes nia. An podará ince tó ca la lege taliana nöia sön la mobilité, che vëiga dant deplü poscibilités da se möie cun la roda en confrunt a denant.

Ci infrastrotöres vá pa ince bun te tēmps de pandemia?

Chèsta domanda ti é gnüda fata a incër 400 ghesc, dantadöt cun referimënt ales sorts de lift che vá bun o nia.

Implü ti unse damané **ci sorts de turism ch'an ó ciamó che crësc, y de ci ch'i nen n'un assá?**

L'EURAC á fat n stüde de basa sön chël ch'al dess spo gní lauré inant por valuté les faziuns positives y negatives dl turism, sön le turism instës y ince sön la jënt che vir te Südtirol: les valutaziuns é gnüdes fates p.ej. sön la basa dl raport dantèr l'intensité dl turism y le numer di abitanc. I problems n'á nia ma consequènzes sön i comuns turistics, mo ince sön i comuns confinanc, che n'á magari nia tröp dainciará, mo che á impó döt le trafich. N ejempl dër tler de chësc vers é le Lech de Braies, olache la fola s'abina ite dal lech, mo düc i paisc olach'al passa la strada da rové pomez mëss tigní fora le trafich. Ince tla Val Badia é situaziuns olach'an vá de chësc vers: le trafich da Puster ite de jënt che vëgn a jí coi schi ma por un n de y s'un vá indô fora da sëra, o les morones d'auti che vëgn adalerch dales cités de Südtirol o ince da München o posc ciamó plü dalunc, ma por fá la roda dles Dolomites y s'un jí indô.

La mobilité dl turism é le majer problem

Al é tler che **por le momënt ne vára nia da gní tles Dolomites ma cun la ferata.** De chësc vers é bonamënter imposcibl da ciafé na soluziun, ince deache i numeri é massa alc y deach'al é ri da s'imaginé na ferata sura i jus, canch'i savun ch'al vëgn te tröc posc jö smöies y lovines, che i grunc mëna y i.i. Porimpó messaràn ciaré da lauré fora n conzet plü ampl, studié fora damí, por ti ester ai problems gaujá da na mobilité che vëgn da ann a ann manco sostenibla.

Él ciamó „lerch“ por deplü turism?

Al vëgn definí na sort de „semafer“ cun les löms vërda, arancia y cöcena, che dess dé dant canch'an á arjunt le mascim che le raiun, la jënt y i.i. pó suporté. Porchël vëgnel damané fora categories desvalies, ince por avèi respostes le plü „oetives“ ch'ara vá: sc'al gniss damané fora porsones che laora cun le turism, dailó foss les respostes dotes „POR“ n svilup turistich lapró, sc'al gniss damané fora porsones che é daldöt contrares a n aumënt dl turism, spo foss les respostes dotes „DECUNTRA“. Porchël é important da tigní en conscidraziun punc d'odüda „neutral“.

Publicaziuns scientifices: informaziun de cualité

Le prof. Bausch stluj jö so intervënt te Junta, spligan l'importanza da publiché i resultat dles inrescides che vëgn fates y da dé inant les informaziuns. Ma sce tröc vëgn alsavèi coch'ara stá veramënter, podarál ince mudé valch tl dagní. La dejinformaziun che vëgn gaujada no ma da Facebook o da d'atri mesi digitai, mo ince da n journalism püch o nia profesional, porta saurí dificoltés, dantadöt por les aministrazziuns comunales y provinziáles che mëss porté inant proiec concrec por mioré de vigni sort de situaziuns y insciö ince la cualité de vita de sü abitanc. De chësc vers é les publicaziuns scientifices scialdi importantes, deach'ares ti dá ince na relevanza ai stüdi che vëgn fac.



I retrac mostra n valgügn momënc tratan la raprezentaziun dl teater musical.



Teater musical „Ujöp da Oies“

Le teater musical „Ujöp da Oies“, porté dant sö Oies ala fin de messé, é sté n suzes por i organisadus y ince por duc chi che á fat para. L'iniziativa dla Müjiga de Badia é gnüda metüda a jí cun l'aiüt dl Sorvisc ai Jogn, che a invié jogn y jones de döta la Val Badia a soné, jobelné y cianté para. Cun l'aiüt de insegnantes, insegnanc y porsones espertes de teater y musiga á pici y gragn albü l'ocajiu da realisé deboriada n proiet che á descedé l'interes por la vita y l'opera de Sant Ujöp da Oies.

Le foliet di miscionars verbic da Steyl scriô bele tl 2020 che la Müjiga de Badia ess orü mëte a jí n teater cun musiga por cunté la vita dl sant da Oies. Dal titul „Ujöp“ pón capí ch'ara nen vá te chësc caje nia dla santificaziun, mo de coche nosc sant é chersciü sö y s'á spo astilé coche miscionar tla Cina. Al ê na porsona scëmpla y cun na fede sterscia, che l'á daidé te tröpes ries situaziuns ch'al á messü afronté.

Le proiet é gnü invié ia ponsan ai compaejans de Ujöp, che baia ladin, le lingaz cun chël che le sant é chersciü sö. Porchël é le test – scrit da Carlo Suani – döt por ladin. Tröc spetadus á dit che les parores ti é jüdes scialdi a cör: l'autur les á tutes fora dles tröpes lëtres de sant Ujöp y portades ite tl teater.

Les melodies é gnüdes scrites da Antonio Rossi, compo-nist ampezan, y portades dant dala Müjiga de Badia sot la bachëta de Fridl Pescoller dl Mone y dal cor sot la dire-ziun de Bruno Rives da San Martin. Por Philip Lerchegger, presidënt dla Müjiga, él sté n „n proiet ladin“, ince deache les 150 porsones che á fat para é chersciüdes sö tles vals ladines y baia ladin. Stefanie Burchia, presidënta dla Müjiga, alza fora la uniun che é gnüda a s'al dé danter duc i protagonisc dla iniziativa: „I sun chersciüs adöm sciöche na gran familia“. Por la Müjiga de Badia, che á acompagné i aturs y les aturies sön paladina, é chësc proiet sté val' de nü y porchël ince scialdi interessant y stimolant.



Tres chësta iniziativa dla Müjiga de Badia y dl Sorvisc ai jogn á tröc mituns y jogn imparé da conëscé damí la storia de Sant Ujöp da Oies.

Valentin Erlacher, direttur da denant dl Sorvisc ai Jogn, che á daidé invié ia döt cant, é dla minunga ch'al sides sté le plü gran proiet ch'al á daidé invié ia te tröc agn de laur por i jogn. Les beles sères da d'isté y la culissa straordinaria sö Oies á zënzater porté pro che le proiet garatass coch'al alda.

Deplü co n ann y mez de proes

Bele de novëmber dl 2021 á jogn y manco jogn metü man da s'arjigné ca, impröma cun n workshop por imparé da se conësce damí. D'aisciöda fora á spo i jobleri y les jobleres metü man cun les proes menades cun savëi dales registes Valentina Kastlunger d'Al Plan y Bernardetta Nagler da La Val. Cun l'aiüt dla coreografa Anastasia Kostner á jobleri y jobleres imparé avisa i movimënc y i balec. La scenografia speziala arjignada ca da Ursula Tavella da La Val á impröma daidé i protagonisc dl teater musical, y spo ince i spetadus, da s'imaginé la vita de Ujöp sö Oies y spo le iade lunch da rové ia tla Cina, olach'al é sté miscionar por tröc agn denanco morí tl 1908.

Imparé valch deplü sön la vita dl sant ladin

I spetadus che orô imparé da conësce ciamó damí la vita de sant Ujöp da Oies podô jí a pe da San Linert cina sö Oies, do le tru dles staziuns, adöm cun i insegnanc de religiun y storia Christian Ferdigg y Giuliana Clara. Les döes „guides“ ti cuntâ bele valch danfora ai plü interessá, por ch'ai se fajess plü sauri da capí tan atual che l'ejëmpl y i valurs de sant Ujöp é ciamó aldedaincö.



Les proes intensives é jüdes inant cina le de dan la pröma raprezentaziun sön paladina ai 22 de messé 2022.

Na bona colaboraziun

Le teater musical „Ujöp“ é garaté cun la colaboraziun de tröpes porsones y uniuns de döta la Val Badia. An pó ince dí ch'al é sté n proiet che á lié adöm deplü generaziuns y che á sensibilisé y informé i compaejans de sant Ujöp sön la vita y l'ejëmpl de fede che ël é sté y é ciamó dötaurela.

Por tröc é le teater musical sté na ocasiun da mëte ala proa so talënt teatral, artistich y musical, jobelnan, balan, ciantan y sonan dan da n publich scialdi numerus che á premié le sforz y i sacrificzi fac por arjigné ca la raprezentaziun a puntin.



Le teater musical „Ujöp“ é gnü porté dant indöt cin' iadi, sön na gran paladina alaleria, metüda sö sö Oies, olache Sant Ujöp é nasciü. Le proiet é gnü metü a jí dala Müjiga de Badia adöm cun le Sorvisc ai Jogn Val Badia. Fotografies de Freddy Planinschek, La Ila.

Scialdé a lëgna... mo dërt!

Sëgn ch'al mët man le tēmp olach'an mēss scialdé, nes dá chi che fej moguns y i scoaciamin, adöm cun l'Ofize provincial por l'aria y le crabal, consëis importanc de coch'an dess scialdé.

An mēss tó le dër material o ciarburant

- Da scialdé pón tó lëgn nia traté, lëgna (liac, rans, vancëis y i.i.) o ince lëgn majené sō y fracé adöm en forma de brichets o pelets.
- Liac y rans da fá fūch fossel bun da lascé assuié y sicé almanco 2 agn denanco i adoré.
- Al é PROIBÍ da tizé papier (foliec, revistes, cartun y i.i.), ciomēnt (pacli dal lat, goti dal iogurt, bozes de plastica y i.i.) y lëgn traté (de vedli mebli, cassētes, talares, balcuns, üsc y i.i.)!
- Chi che tiza ciomēnt o lëgna tōmia n'impaziēia nia ma l'ambiēnt y destūrba i vijins cun le ri tof, mo se fej propi te sūa ciasa n cocktail da tosser.
- Tres i gasc agressifs y i aji che se formēia da borjé ciomēnt él ince i moguns y i furní che tēgn manco dí y la manutenziun costa deplü. Le prigo de n medefūch fora dl ciamin vëgn majer.



La lëgna mess ester bela sēcia, porchël mēsson la lascé assuié y sicé almanco dui agn alalungia.



Ci pón pa sciuré te furnel y ci pa nia?

Ciara da ester sauber – scialda cun de dërta lëgna!

Lëgna sūta, coch'ara é, y nia tratada, brichets y pelets de lëgn, liac, ziples, resc de lignan dla siēia, vancëis y coches.

Le furnel n'é degōna bēna dal ciomēnt, porchël ne dessel nia sciuré ite refodam, papier, foliec, revistes, cartun, pacli (tetrapak), injops, plastica de vigni sort, lëgn traté o incolé adöm, panel, resc de lignan fora de cantiers, cassētes, paletes, resc de lignan fora de tistlaries o bercstots da zumpradú.

Tizé dërt

- I gragn liac sotite, i pici liac y les aristles suraia.
- Dé fūch tla pert söinsom.
- Insciō pón desmendrí cotan les sostanzes da tosser che vëgn fora.
- An ne dess nia mēte ite massa patüc da scialdé te n iade (se tigní ales indicaziuns dla dita che á fat le mogun o furnel).
- Denanco impié mēss les tlapes o porteles dal'aria ester davertes sō daldöt.

Al mēss verde jö dërt

- Tratan ch'al verd mēss les tlapes o porteles dal'aria resté davertes sō daldöt.
- Sc'al é debojëgn, desson impormó mēte do lëgna canch'al é ma plü borëi.
- Les tlapes o porteles dal'aria pó impormó gní stlütēs canch'an ne vëiga plü degōnes flames gheles (ma plü de piceres, brōmes).
- Nia tigní jö le fūch!
- Puzené dërt y lascé ciaré do
- Lascede scoé regularmēnter le ciamin dal scoaciamin y ne se desmentiede nia lascé ciaré do i moguns y furní da na porsona cualificada. I podëis ince damané do te vigni momēnt al artejan che ves á metü ite le mogun o furnel y a osc scoaciamin.

N sorvisc de gran valüta por la comunité

Le sorvisc de verdastrada por i scolars é gnü istituí le pröm iade tl ann 2008 y cun l'ann de scora 2022/2023 á ince le verdastrada por scolars („nonno vigile“) Renato Ploner podü pié do n pice sègn de reconescënza da pert dl Comun por i 10 agn de sorvisc.

Ara se trata de n cheder cun na caricatöra dl artist Manuel Crazzolar „Menny“, che ti é gnü surandé dal comandant dla Polizia locala Franz Dapoz.

I verdastrada por scolars é oramai figöres conosciüdes por i scolars che vá a scora: ëi i dëida passé ia la strada statala en segurëza, ti posc plü prigorusc. Cun bel o bur tēp ési dagnora presēnc sōn strada, cun paleta y corpet che slomina. Le sorvisc vëgn fat cun trōpa lezitēnza y cun ligrëza, n valgügn le fej ince debann.

Ara se trata de ex Carabinieri y de d'atres porsones en ponsiun che s'á metü a desposiziun dl Comun por ti garantí ma maiú segurëza ai scolars dles elementares. Insigná jō dala Polizia locala, che se crüzia ince da organisé i orars y i dis de sorvisc, ési nü mëisc al ann sōn strada canche i scolars é söl tru da jí y da gní da scora.

Al momēt él cin' porsones che se crüzia da fá le sorvisc, che tomará bonamēnter demez cun le proscimo ann, deach'al mancia porsones che se mēt a desposiziun. Da rengrazié él ch'al n'é mai sozedü nia, chël ó ince dí che i verdastrada á fat y fej le sorvisc cun competēnza y savēi: ai vëgn respetá sides dai scolars co ince dai automobilisc. La Polizia locala y dōta l'Aministraziun ti sporj n gran giulan por le sorvisc ch'ai á dagnora fat y ch'ai fej por la segurëza di scolars.

Renato Ploner da Ninz cumplēsc de novēمبر i 80 agn y l'Aministraziun de Comun ti fej porchēl les mius aodanzas.



n pice sègn de reconescënza por 10 agn de sorvisc da verdastrada por scolars.

IMPORTANT!

Detlaraziun de portignēnza al grup linguistich

Canche n jonn o na jona complēsc 18 agn ciafel/ra dal Comun de Badia na lētra racomanada, cun chēra ch'al ti vëgn comuniché che al/ara á la poscibilité da dé jō sūa **detlaraziun de portignēnza** al grup linguistich talian, todēsch o ladin (art. 3, coma 5, dl decret legislatif di 23.05.2005, nr. 99).

Chēsta detlaraziun é dēr importanta, deache ara é scritta dant por podēi tō pert a concursc por i posc de laur publics, che vëgn partis sō aladō di grups linguistics. Ince por podēi fá domanda de contribuc publics o por damané do na ciasa IPES adoron chēsc zertificat.

Al ti vëgn porchēl aconsié a dūc i jogn y ales jones da tigní en conscidraziun les indicaziuns ch'ai ciafa tla lētra menada fora dal Comun, por n'avēi nia plü tert dificoltés da ciafé le zertificat de portignēnza al grup linguistich, magari canch'an l'adora atira por fá val' domanda de contribut o por tō pert a n concurs.

Sce valgügn adora informaziuns plü avisa pói telefoné tratan l'orar d'ofize a Adalbert Piccolruaz (0471-838229) o passé diretamēnter te Comun.

Orar d'ofize:

lōnesc – vëndres, 08:00 – 12:30,
lōnesc y mercui, ince 16:00 – 17:30.



LIZENZES DA FRABICHÉ

Lizènzes da frabiché dades fora aladô dl art. 70
dla lege urbanistica dla Provinzia Autonoma de Balsan nr. 13/1997

Lizènzes da frabiché dades fora d'agost 2022

Piccolruaz Giuseppe	Proiet de varianta da fá sô na majun y na zopa dala coltôra sôn la p.d.t. 2105/1 C.C. Badia – loc. Ruac	Badia
---------------------	---	-------

Lizènzes da frabiché dades fora de setëmber 2022

Piai Albert, Piai Fabian, Piai Tamara	Proiet de varianta da trá jô y da fá sô te n ater post le lüch cun stala, majun y ciasa sôn la p.d.f. 155 y les p.d.t. 1354/1, 1355 y 1356 C.C. Badia – loc. Peslalz	Badia
---------------------------------------	--	-------



LIZENZES DA FRABICHÉ

Lizènzes da frabiché dades fora aladô dl art. 76
dla lege urbanistica dla Provinzia Autonoma de Balsan nr. 9/2018

Lizènzes da frabiché dades fora d'agost 2022

Adang Evelyn	1. varianta – realisaziun de na raitadoia nôia y restrotoraziun dla majun esistènta sôn le lüch stlüt d'Adan sôn les p.d.f. 1590 y 786 y les p.d.f. 1370, 1371/1, 1375, 1377, 1386 y 1369 C.C. Badia – loc. Adan	Badia
Daprè Agnese, Daprè Carlo, Daprè Frieda	Ampliamënt y restrotoraziun cun ressanamënt energetich de na pert dla strotôra esistènta dla ciasa d'abitaziun sôn la p.d.f. 1573 C.C. Badia – str. Anvi 44	Badia
Janousek Vladislav	Proiet da fá mudaziuns daite en sanatoria, aladô dl art. 95 dla L.P. 9/2018, pro la pröma alzada dl frabicat sôn la p.d.f. 1919 P.M 4 C.C. Badia – str. Marin 12	La Ila

Lizènzes da frabiché dades fora de setëmber 2022

Costa Freddy	Realisaziun de dui posc da parché sôn la p.d.t. 2345/1 y la p.d.f. 301 C.C. Badia pro la ciasa d'abitaziun sôn la p.d.f. 299 C.C. Badia – loc. Pransarores	Badia
Ligna Calor S.p.a.	Costruziun de n acumuladú de cialt sôn la plaza da mète jô les ziples por le telescialdamënt sôn la p.d.t. 3104/3 C.C. Badia – str. Ninz 47	La Ila
Clement Alexander	Realisaziun de na ciasa d'abitaziun y de n garage agricul pro le lüch stlüt de Sotgherdëna sôn les p.d.t. 797, 798 y 5215 C.C. Badia – loc. Sotgherdëna	Badia
Miribung Monika, Pescollderungg Thomas	Proiet de varianta por restrotoré, tó demez les barieres architettoniches, fá pormez n lift y ressané la ciasa d'abitaziun dal punt d'odüda energetich sôn la p.d.f. 1614 C.C. Badia – str. Costadodoi 45	San Ciascian
Hotel Lech da Sompunt de Castlunger Manfred & C. S.a.s.	Sistemaziun dles falzades defora y mudaziuns daite pro le Hotel Lech da Sompunt sôn la p.d.f. 1104 y la p.d.t. 1219/3 C.C. Badia – str. Sompunt 36	Badia
Gardenacia de Nagler Martin & C. S.n.c.	Restrotoraziun y ampliamënt dla ütia de Gherdenacia sôn les p.d.f. 906 y 2828 C.C. Badia – munt de Gherdenacia	Badia
Brunetta Alessandro, Brunetta Michele, Pitscheider Martina	Laurs da restrotoré i sorasc, da deslarié dui üsc da jí fora y de manutenziun straordinaria dla ciasa d'abitaziun sôn la p.d.f. 985 C.C. Badia – str. Anvi 31	Badia
Ploner Roland	Ampliamënt cualitativ y de pices mudaziuns daite pro l'eserzize d'alberch Hotel Gran Paradiso sôn la p.d.f. 1132 C.C. Badia – str. Pre de Vi 11	San Ciascian
Hotel Armentarola de Toni Wieser & C. S.a.s.	Ampliamënt cualitativ dl Hotel Armentarola sôn la p.d.f. 883 y la p.d.t. 4278/9 C.C. Badia – str. Pre de Vi 12	San Ciascian
Seggiovie Sompunt S.p.a.	Stabilisaziun dla pista dai schi „Sponata“ sôn les p.d.t. 3193/1, 1219/1, 1219/4 y 1219/7 C.C. Badia	La Ila
Agreiter Vito	Realisaziun de na botëga tla cianoa y ressanamënt dla capela tla secunda alzada dl lüch da Ciampidel sôn la p.d.f. 667 y les p.d.t. 4936 y 4937 C.C. Badia – loc. Ciampidel 31	San Ciascian
Findolomit S.r.l.	Proiet de varianta en sanatoria (art. 95 dla L.P. 09/2018) por trá jô y fá sô danü le frabicat cun ressanamënt energetich y realisaziun de n garage che alda lapró (art. 124 dla L.P. 13/97) sôn les p.d.f. 1329 C.C. Badia – str. Picenin 26	La Ila
Sport Tony S.a.s. de Frenademez Andreas & Co.	Ampliamënt dla botëga da alimentars tl'alzada te tera dl frabicat Sport Tony sôn la p.d.f. 1221 C.C. Badia – str. Colz 56	La Ila
Miraval S.r.l. de Crazzolar Bernardette & Co.	Proiet de variata por le ressanamënt energetich y ampliamënt dl eserzize d'alberch Miraval sôn la p.d.f. 2059 C.C. Badia – str. Sompunt 19	La Ila
Dariz S.r.l.	Ampliamënt dl'alzada a tera dla lavandaria Dariz tla zona por insediament produtifs Ciaminades, lot M, sôn la p.d.f. 1492 C.C. Badia – str. Damez 25	Badia
Rosa Alpina 1537 S.r.l.	Ampliamënt cualitativ, ressanamënt y recuperada energetica aladô dl art. 62, coma 1, lètres d) y e) dla L.P. 9/2018 dl eserzize d'alberch Hotel Rosa Alpina dependance sôn les p.d.f. 1236 y 1512 C.C. Badia – str. Micurá de Rü 18	San Ciascian



Udiënzes dl ombolt y di assessurs dl Comun de Badia

Ombolt Iaco Frenademetz: Lönesc y vëndres, dales 10.00 ales 12.30; mercui, dales 16.00 ales 17.30. Al vëgn ince dé udiënza tratan l'orar de daurida di ofizi de comun, sce l'ombolt é presënt.

Vize-ombolt Christian Pedevilla: Vëndres, dales 8.00 ales 9.00

Assessuria Edith Dapoz: Lönesc, dales 11.30 ales 12.30

Assessuria Elide Mussner: Mertesc, dales 9.00 ales 10.00

Assessur Thomas Pescolliderungg: Vigni pröm mercui dl mëis, dales 8.00 ales 9.00

Assessur Werner Pescosta: Vëndres, dales 11.00 ales 12.00

Les udiënzes di assessurs vëgn tignides sön apuntamënt da fissé cun l'Ofize protocol pro le secreter Elia Adang (tel. 0471 838221).



Udiënzes dla Defensuria popolar

La **defensuria popolar** dr.a **Gabriele Morandell** y la **suplènta** dr.a **Verena Crazzolara** tègn sües udiënzes a San Martin de Tor, tl salf di Stödafüch (str. Tor 19), vigni dui mëisc, dagnora le secundo vëndres dl mëis, dales 14.00 ales 17.00.

Les **udiënzes tl 2023** sará ai 11 de jená, 10 de merz, 12 de ma, 14 de messé, 8 de setëmber y ai 10 de novëmber 2023. **An mëss se prenoté danfora!** Por tó n apuntamënt pón cherdé sö le numer de telefon 0471 946020.

Ofize Defensuria popolar
39100 Balsan, strada Cavour 23
Plata internet: www.volksanwaltschaft.bz.it

Orar por le publich:
lönesc-vëndres, 09.00 – 12.00 y 15.00 – 16.30

La defensuria popolar vëgn litada dal Consèi provinzial. Ara é la mediaturia danter le zitadin y l'aministrasiun publica. Te süa ativité vëgnera sostignida da colauradus y colauradësses cualificades che formëia le team dla Defenüda zivica.

Consèi de Formaziun sentada generala

Le **Consèi de Formaziun dl Comun de Badia** tègn süa **reuniun generala** ai **22 de novëmber 2022, dales 19.30, tl zënter SajUn (Ciasa de Cultura) a La Ila.**

Impröma vëgnel tigní l'incuntada anuala dl Consèi de Formaziun cun i rapresentanc dles uniuns y assoziaziuns culturales, al gnará spo aprové le cunt consuntif por l'ann 2022 y porté dant les initiatives ch'an s'á tut dant por l'ann 2023. Implü gnarál ciomó aprové le Statut nü.

Dedó él le jonn Alexander Liotto che cunta y mostra fotografies dles tröpes aventöres ch'al á vit da jí cun la roda por döta la Talia. So intervënt á le titul: „lò y mia roda... sön le tru de n some!“



Consèi de Formaziun

Badia



Program altonn 2022

Data	Iniziativa	
29.11. dales 20.00	Le cambiament climatic y sües consequènz Referènt: Univ. Prof. Dr. Georg Kaser, glaziologh Post: Ciasa de Cultura a La Ila	
13.01.2023 dales 17.00	Na cité a mosöra de porsona y de ambiènt - Planificaziun urbanistica sostenibla Discussiun daverda cun Helmut Moroder, Philipp Rier y Vigna Bussadori. En colaboraziun cun le Comun de Badia Post: Ciasa de Cultura a La Ila	

Racoiüda dl öre adoré

Les dites podará dé jö l'öre adoré la jöbia, ai 23.03.2023, y le lönesc, ai 24.04.2023. Sce zacai ess da avëi de gran quantités da dé jö amesa l'ann o cun na certa prescia, pói damané do na jotada implü, contatan diretamënter la dita Dabringer S.r.l. al nr. de telefon **0472 979700** o menan na e-mail **info@dabringer.it**



RECYCLING „COL MALADËT“ - Orars

Lönesc	danmisdé stlüt	13:00 – 18:00
Mertesc	07:00 – 12:30	domisdé stlüt
Mercui	danmisdé stlüt	13:00 – 18:00
Jöbia	07:00 – 12:30	domisdé stlüt
Vëndres	danmisdé stlüt	13:00 – 18:00
Sabeda	07:00 – 11:00	domisdé stlüt

Les domënies y i dis de festa él stlüt

Cuntra la violënza sön les ëres Defenesse. I PODËIS CIAFÉ AIÜT!

Numer
d'emergënza

☎ 112

☎ 1522



Balsan

GEA Zënter cuntra la violënza

☎ 800 276 433 | www.casadelledonnebz.it

Ciasa dles abitaziuns protezionades

☎ 800 892 828 | www.hdgw.it

Maran

Ëres cuntra la violënza

☎ 800 014 008 | www.donnecontrolaviolenza.org

Bornech

Zënter cuntra la violënza Val de Puster

☎ 800 310 303 | www.bezirksgemeinschaftpustertal.it

Porsenú

Zënter cuntra la violënza Val dl Isarch

☎ 800 601 330 | www.bzgeisacktal.it



Landesbeirat für Chancengleichheit für Frauen
Commission provinciale per le pari opportunità per le donne
Comission provinciela per la valinza dla chances per l'ëlis

L'EHO RÖIA A ...

L'EHO a ciasa!

Por ciafé L'EHO präibel
cherdé sö diretamënter
Adalbert Piccolruaz te Comun al
numer de telefon 0471 838229 o mené na
e-mail a adalbert.piccolruaz@comune.badia.bz.it

